

Ekwo

Ndu-ikpe

Ndu Ízurelu etso ndu Kénanu ophu phoduru nu ọgu

1 ¹ Jioshuwa nwuhuchaepo; ndu Ízurelu bya akpata Chipfu ishi su iya: “?Bụ onye e-vuru ụzo je etsooru anyi ndu Kénanu ọgu?”

² Chipfu su phe: “Ọo ndu Jiuda be e-je nu; mu wowaru ali ono ye phe l'eka.”

³ Tobudu iya bu; ndu Jiuda bya asu ndu ke Simiyonu, bu unwune phe: “Unu bya g'anyi tuko je l'ali ono, a nuru anyi ono je etsoo ndu Kénanu ọgu. E -mechaa anyi ee-tsoru unu jee ọgu k'unu.” Ọo ya bu; ndu Simiyonu tsoru phe jeshia. ⁴ No iya; ndu Jiuda jenu etsoo phe ọgu ono. Chipfu woru ndu Kénanu waa ndu Pérezu ye phe l'eka; ephe gbua ukporo unu nemadzụ l'unu ise le mkpukpu Bezeku. ⁵ Ọ buru le mkpukpu Bezeku ono be ephe humaru Adoni-Bezeku; bya etsokwaa ya pho ọgu. Ọ buru iya bu l'ephe alwu-kpee ndu Kénanu waa ndu Pérezu. ⁶ Adoni-Bezeku ye okpa l'oso. Ephe chia ya gude; bushia ya mkpushi-eka ezekeka waa mkpushi-okpa ezekokpa. ⁷ No iya; Adoni-Bezeku su: “Ukporo ndu eze eto le ndu eze iri, e bushiru ezekeka me ezekokpa shi atutuje eputara le mkpula teburu mu. Nta-a be Chileke pfuwaru mu ugwo iphe, mu meru phe.” Ephe kpuru iya jeshia Jierusalem; o buru l'eka ono be o mechaaru nodu nwuhu.

⁸ Ndu Jiuda tsokwaapho mkpukpu Jierusalemu ọgu; lwuta iya. Ephe gude ogu-echi gbufu mkpukpu ono; tufu iya oku. ⁹ E mechaa; ndu Jiuda jepfushia ndu Kénanu ọgu; mbu ndu Kénanu ophu bu l'ali ubvu ubvu; me l'echiegu ndohali; me l'ali okpa ubvu, no l'uzo enyanwu-ariba.

Qtuniyelu alwuta mkpukpu Debi
(*Jios 15:13-19*)

¹⁰ Ndu ke Jiuda ono bya ejekwapho je etsoo ndu Kénanu ophu bu le mkpukpu Heburonu ọgu; lwuta ndu Sheshayi; me ndu Ahimanu; waa ndu

Talumayi. Iphe, e shi ekuje Hẹburonu lẹ mbụ bụ Kiriyatu-Araba. ¹¹ Ẹphe gbẹ l'ẹka ono wuru jeshia ndu mkpukpu Debi ogu. Iphe, e shi ekuje Debi bụ Kiriyatu-Sefa. ¹² No iya; Kalebu su: “Onye gbeshikpowaru je etsoo ndu Kiriyatu-Sefa ogu; lwuwa phe lwuta; mu e-ke onye obu nwatibe mu, bụ Akusa g'o luru.” ¹³ Otuniyelu nwa Kenazu, nwune Kalebu ke nwata tugbua je alwuta mkpukpu ono. Oo ya bu; Kalebu kee ya nwada iya ono, bụ Akusa; o luru.

¹⁴ O lwaepho ibe Otuniyelu; o su iya g'o je epfuaru nna iya, bụ Kalebu g'o wee ya ali.

Akusa bya enyizeta l'eli nkafu-igara iya; Kalebu jia ya su: “?Bu gunu be mu e-meru ngu?”

¹⁵ O su iya: “Menaaru mu iphe-oma. Eshinu i suru ge mu laa echiegu ndohali; nufunaa mu ali l'eka mini, anwu shokoshoko.” Oo ya bu; Kalebu bya eworu eka mini anwu shokoshoko l'eka du dagere-dagere me l'eka bu ohu ali woru nu iya.

¹⁶ Oshilokpa ogo Mosisu, bu iya bu ndu Kenu be yee ndu Jiuda shi le mkpukpu Jieriko, bu iya bu ndu Oha-mpfu tuko wufu jeshia echiegu ndu Jiuda, bu iya bu eka ono, no l'echiegu ndohali le mgboru mkpukpu Aradu. Oo ya bu; epehe tuko buru l'eka ono. ¹⁷ Tobudu iya bu; ndu Jiuda me ndu Simiyonu, bu unwunna phe tugbabe nanu je etsoo ndu Kenu ophu bu le mkpukpu Zefatu ogu; mekota mkpukpu ono l'ophu; o chihu. Oo ya bu e kuahaa mkpukpu ono Homa, bu iya bu “mkpurupyata”. ¹⁸ Ndu Jiuda lwutakwarupho ali Gaza; me ali Ashikelonu; me ali Ekuronu; lwutakota mkpukpu, nokota iya nu. ¹⁹ Chipfu no swiru ndu Jiuda; epehe lwuta ndu bu l'eka du ubvu ubvu. Ndu ophu bu le nsuda be kporu phe achishi kele ndu k'ono be nweru ugbo-inya ogu, e gude igwe mee. ²⁰ Mkpukpu Hẹburonu be a nuru Kalebu; kele Mosisu kwehawaru iya ukwe iya. Kalebu bya achishia unwu Anaku eto, bu l'eka ono. ²¹ Ndu Benjiaminu be ta achifuduru ndu Jiebusu, bu le Jierusalemu. Ndu Benjiaminu yee ndu Jiebusu tuko buru eghirigha le Jierusalemu byasu ntanu-a.

²² Ndu onu-ulo ke Jiosefu be jekwarupho etsoo mkpukpu Betelu ogu; Chipfu swikporu phe eswiru. ²³ Epehe bya ezia ndu e-je anwu nge le Betelu ono, bu iphe, o shi aza bu Luzu. ²⁴ Ndu ono huma nwoke, shi le mkpukpu ono alufuta. Epehe su iya: “Jiko goshinu anyi onu-abata mkpukpu-a. Anyi e-mekwaru ngu-a iphe-oma.” ²⁵ Oo ya bu; o goshi phe onu-abata mkpukpu ono. Epehe tsoo ndu mkpukpu ono ogu; gude ogu-echi gbushikota phe. Ole epehe haru nwoke ono; waa ndibe iya l'ophu. ²⁶ Tobudu iya bu; nwoke ono kwafu lashia ali ndu Hetu, bu eka o buwaro jaa buru mkpukpu eka iya. O gube mkpukpu ono Luzu, bu iya bu iphe, oza byasu ntanu-a.

Oha, ndu Izuru ta achifuduru

²⁷ Ndu Manase be ta achifuduru ndu ali Betu-Shanu waa mkpukpu iya; me ndu ali Tanaku; me ndu ali Doru; me ndu ali Ibulamu; me ndu

alì Megido; mē mkpūkpu lẹ mkpūkpu, nọgbaa phẹ nu; kele ndu Kénanu ono bẹ kpọfuru ishi phẹ ye l'alì ono. ²⁸A nọnyaa; ndu Ízurẹlu bya enweru agburehu; ẹphe kebuta ndu Kénanu; ẹphe jeahaaru phẹ ozi; kele ẹphe ta achifugbuduru ndu Kénanu ono.

²⁹Ndu Ifuremu bẹ ta achifukwarupho ndu Kénanu ndu ophu bu lẹ mkpūkpu Geza; ẹphe l'ẹphe tuko bua ẹghirigha l'ẹka ono.

³⁰Ndu kẹ Zebulun bẹ ta achifuduru ndu ophu bu lẹ mkpūkpu Kituronu; mē ndu ophu bu lẹ mkpūkpu Nahalolu. Ndu Kénanu ono, bu l'echilabo phẹ ono; jeahaaru phẹ ozi.

³¹Ndu kẹ Asha bẹ ta achifuduru ndu bu lẹ mkpūkpu Ako; mē ndu ophu bu lẹ mkpūkpu Sayidonu; mē ndu mkpūkpu Ahulabu; mē ndu mkpūkpu Akuzibu; mē ndu mkpūkpu Heluba; mē ndu mkpūkpu Afeku; mē ndu mkpūkpu Rehobu. ³²Oo ya bu; ndu Asha buru l'echilabo ndu Kénanu, bu ndu vuhawaa ọzo buru l'alì ono; kele ndu Asha bẹ ta achifuduru phẹ.

³³Ndu Nafutali bẹ ta achifuduru ndu bu lẹ mkpūkpu Betu-Shemeshi; waa ndu bu lẹ mkpūkpu Betu-Anatu. Ẹphe buru l'echilabo ndu Kénanu, bu ndu vuhawa ọzo buru l'alì ono. Ẹphe mee ndu Betu-Shemeshi; waa ndu Betu-Anatu; ẹphe jeahaaru phẹ ozi.

³⁴Ndu Amoru bẹ nwularu ndu Danu azu; chiru phẹ ye l'alì úbvú úbvú. Ophu ẹphe te ekwedu g'ẹphe wu-pfuta phẹ lẹ nsuda. ³⁵Oo ya bu; ndu Amoru kebe l'ẹphe bufutajẹ l'úbvú Heresu; mē lẹ mkpūkpu Ajialonu; mē lẹ mkpūkpu Shalubimu. A nọnya ndu onu-ulo Jiófẹfu bya aja àjàjà ka l'otu; bya aka enweru okpehu; ẹphe kebuta ndu Amoru ẹphe jeahaaru phẹ ozi mkponwu-ẹhu.

³⁶Oke-alì ndu Amoru bẹ shi l'ọzo isheli úbvú “Akpi” nọo jasụ lẹ mkpūkpu Sela; bya akwasẹwaruro ya.

Aabarụ ndu Ízurẹlu mba

2 ¹Ojozi-imigwe, shi l'ẹka Chipfu bya agbẹ lẹ mkpūkpu Gilugalu jeshia lẹ mkpūkpu Bokimu je asu: “Mu dufutaru unubẹ ndu Ízurẹlu l'alì Ijiputu; duru unu ye l'alì ono, mu riburu nte lẹ mu a-nu nna unu ono. Mu sụ lẹ mu ta abyadu emebyi oğbandzu, mu lẹ unu gbaru. ²L'unubedua bẹ bu iphe, duru unu bu g'unu lẹ ndu bu l'alì-a ta gbashì ndzụ; unu e-chikposhikota oru-ngweja phẹ. Obenu l'unu jikaru eme iphe ono, mu pfuru unu g'unu mee ono. ?Bu gunu kparu iphe, unu meru egube ono? ³Eshinu o du nno bẹ iphe, mu epfuru unu nta-a bu lẹ mu taa chifuekwaru unu ndu ono. Ẹphe a-buru unu aghamehu; teme agwa phẹ, a-buru ọnyà, unu a-nmalahuje.” ⁴Ojozi-imigwe, shi l'ẹka Chipfu ono pfuchaerupho ndu Ízurẹlu iphe ono; ẹphe tushia ọzu-ẹkwa. ⁵Oo ya bu; ẹphe gube ẹka ono “Bokimu, ọzu-ẹkwa.” Ẹphe nọdu l'ẹka ono gwaa Chipfu.

Anwuhu Jioshuwa

⁶Tọbudu iya bu Jioshuwa sụchaa gẹ ndu Ízurẹlu lashia; onyenonu laa je enwechaaru oke alì nkiya. ⁷Ẹphe bakotaru Chipfu eja lẹ teke Jioshuwa nọ

ndzụ; mękwapho lę teke ndu bụ ọgerenya ọphu ka Jioshuwa aka nka nọ ndzụ, bụ iya bụ ndu ono, humakotaru iphe, dū biribiri, Chipfu meshiru ndu Ízuru-relu ono. ⁸ Onye-ozí Chipfu, bụ Jioshuwa; nwa Nunu bę nọru ụkporo apha ise l'apha iri; ọ nwụhu. ⁹ Epehe lia ya l'ęka o nweru alí lę mkpụkpu Timunatu-Hęresu, nọ l'alí úbvú úbvú Ifuremu l'uzo isheli úbvú Gashí. ¹⁰ Ogbo k'ono nwụshihu-gbuchaeֆpho lapfuchaa nna phe; ọgbo ọzo bya alufuta, bụ ndu ta amadu Chipfu; ọphu epfuro k'iphe, dū biribiri ono, o meshiru ndu Ízuru-relu ono.

Ndu Ízuru-relu abaru Balu eja

¹¹ Tọbudu iya bụ; ndu Ízuru-relu meahaa ejo-ememe l'ęnya Chipfu; bya awata abaru Balu eja; ¹² mbu; paru Chipfu, bụ Chileke kę nna phe haa, bụ onye ono, dufutaru phe l'alí Ijiputu ono. Epehe tsoru iphe, bụ agwa ndu bupheru phe mgburugburu baaharu eja. Epehe kpatsunu Chipfu ehu-eghu; ¹³ kele epehe paru Chipfu haa; baaharu agwa Balu; waa Ashitoretu eja. ¹⁴ Tọbudu iya bụ; oke ehu-eghu Chipfu dafuta ndu Ízuru-relu; o woru phe ye l'ęka ndu ọ-lwua-ọlaa; epehe lwua phe alwulwu. O nwuru phe nū ndu ọhogu phe, bupheru phe mgburugburu, bụ ndu epehe ta aduedu ike wotaba ọgu ozoba. ¹⁵ Ekameka, epehe jekporu bę Chipfu ahajęe phe pho; g'e emekpee phe; mbu egube ono, o pfuhawaru phe l'ọ-ọdu anwuru phe ono. O bunuru iya bụ l'ęphe anodunu l'oke iphe-ehuka.

¹⁶ A nonya Chipfu bya emee epehe nweru ndu-ikpe, bụ ndu adzoje phe l'ęka ndu lwutaru phe nū. ¹⁷ Obenu l'ęphe ta angabekwarupho ndu-ikpe phe ono nchi; kele epehe tsoleru-a apharwushi onwophe l'abaru agwa eja. Epehe dakoberu gbakuta azu l'etso uzu ono, nna phe tsoru ono, bụ iya bụ; eme ekemu Chipfu. Epehe te emeduru gę nna phe. ¹⁸ O ọdu abujeru teke Chipfu meru g'ęphe nweru Onye-ikpe; o swiru onye-ikpe ono eswiru; gude onye-ikpe ono dzotakota phe l'ęka ndu ọhogu phe jasụ g'onye-ikpe ono a-nọ-beru ndzụ. Iphe, kparu iya nū buru l'ude, epehe atsuje lę k'ishi, ndu ono akparya phe; mę k'ęhu, epehe anoduje emekpa phe; bę l'emeje imemini phe adu Chipfu. ¹⁹ Teke onye-ikpe ono nwuhuerupho; epehe adakobe; kabaa apharwushi onwophe eme lę gę nna phe meru; mbu ephozeru agwa abaru iya eja. Epehe te ekwedu haa ejo-ememe phe; ọphu epehe ta ahaduru ekwefuru Chipfu ike. ²⁰ No iya; oke ehu-eghu Chipfu dafuta ndu Ízuru-relu; ọ sụ: “Eshinu ọha-a mebiwaru ogbandzu ono, mu meru doberu nna phe ono; ọphu epehe ta angajeedu nchi l'iphe, mu pfuru; ²¹ bę mu ta abyadu achifukwaduru phe ọha ono, Jioshuwa ta chishiduru; teme ọ nwụhu ono. ²² Mu e-gude phe huta ndu Ízuru-relu ama; maeduru? epehe a-wata etso mube Chipfu egube nna phe oche tsoru mu?” ²³ Oo ya bụ; Chipfu paru ọha ono haa; ọphu o woduru phe ye Jioshuwa l'ęka; mbu shi nno chishi-kebe phe egwegwa.

Ọha, Chipfu ta achishiduru ndu Ízuru-relu

3 ¹ Waa ọha ono, Chipfu paru haa g'o gude hua ndu Ízuru-relu ama; mbu ndu Ízuru-relu, ndu ọphu ta amadu k'ogu ono, alwuru l'alí Kėnanu

ono. ²Iphe, kparụ iphe o meru iphe-a bụ g'o gude iya zia ụnwu Ízurẹlu ndu ọp̄hu te eshidu maru g'aalwuje ọgu ẹgube aalwuje iya. ³Ọha ono bụ ụmadzu ise, bụ ndu-ishi ndu Filisitayinu; mę ndu Kėnanu l'ophu; mę ndu Sayıdonu; mę ndu Hevu, bukoṭa l'úbvú úbvú Lébanonu; e-shikp̄o l'úbvú Belu-Hamonu je akpaa lę mkp̄ukpu Lebo-Hamatu. ⁴Chipfu ta achishi-duru p̄hę g'o gude p̄hę h̄taje ndu Ízurẹlu ama g'ọ maru; ̄ephę e-meje-a ekemu Chipfu; mbụ ekemu ono, o shi l'ẹka Mosisu t̄uru n̄u nna p̄hę ono. ⁵Ndu Ízurẹlu buru l'echilabọ ndu Kėnanu; mę ndu Hetu; mę ndu Amọru; mę ndu P̄rezu; mę ndu Hevu; waa ndu Jiebusu. ⁶Ndu Ízurẹlu wata alu ụnwada ndu ono; bya ewojekwarupho ụnwada nkephę kee unwoke ndu ọhozo ono; bya abaahakwarupho agwa p̄hę ẹja.

Ọtuniyelu adzọ ndu Ízurẹlu

⁷Ndu Ízurẹlu bya emee ẹjo-ememe l'ęnya Chipfu. Ẹp̄hę zoharu Chipfu, bụ Chileke p̄hę; baaharu Balu mę Ashera ẹja. ⁸Tobudu iya bụ; Chipfu swibenuru ndu Ízurẹlu ẹhu-eghu; k'ophu o nwuru p̄hę ye l'ẹka Kushanu-Rishatayimu, bụ iya bụ eze ndu Mesopotėmiya. Ndu Ízurẹlu ọdu Kushanu-Rishatayimu l'ẹka apha ẹsato. ⁹A ọnyaa; ndu Ízurẹlu raku Chipfu; ọ n̄u p̄hę onye ndzọta, bụ Ọtuniyelu nwa Kenazu; mbụ Kenazu, bụ nwune Kalebu kę nwata; ọ dzọta p̄hę. ¹⁰Unme Chipfu bya ẹji iya ẹhu; ọ bya aburu onye-ikpe ndu Ízurẹlu. Ọ t̄ugbua jeshia ọgu; Chipfu woru Kushanu-Rishatayimu, bụ eze ndu Mesopotėmiya ye iya l'ẹka; ọ lwu-kpee Kushanu-Rishatayimu. ¹¹Tobudu iya bụ; alı ono buru lę nchị-odoo ụkporo apha labọ. Ọo ya bụ Ọtuniyelu, bụ nwa Kenazu bya anw̄hu.

Ehudu adzọ ndu Ízurẹlu l'ẹka ndu Mówabu

¹²No iya; ndu Ízurẹlu bya emekwaa ẹjo-ememe ọzobaa l'ęnya Chipfu. Ọo ya bụ; Chipfu gude n̄u k'ẹjo-ememe ono ẹp̄hę meru ono mee Ẹgulonu, bụ eze ndu Mówabu ọ kapyabę p̄hę. ¹³Ọo ya bụ; Ẹgulonu je akpakọ ndu Amonu; waa ndu Amaleku; ẹp̄hę je alwu-kpee ndu Ízurẹlu. Ẹp̄hę nata p̄hę mkp̄ukpu Ọha-mpf̄u ono. ¹⁴Ndu Ízurẹlu ọo l'ẹka Ẹgulonu, bụ eze ndu Mówabu ono apha iri l'ẹsato.

¹⁵Ọle ndu Ízurẹlu rakuerupho Chipfu; ọ n̄u p̄hę onye ndzọta, bụ Ehudu; nwa Gera; bya aburu onye shi l'okpa-ipfu Benjiaminu. Ọ bụ onye eme ẹkicha. O be teke ndu Ízurẹlu byaru aturu utu n̄u iya g'o je anu Ẹgulonu, bụ iya bụ eze ndu Mówabu; ¹⁶Ehudu bya emeta ogu-echi, atsụ nkọ akpata iphu labọ, ogologo iya habe gę nkwo-ẹka lanu; woru nwua l'ime uwe iya l'utapfu okpa ẹkutara. ¹⁷O je eworu utu ono n̄u Ẹgulonu, bụ eze ndu Mówabu. Ẹgulonu bę bụ onye d̄u okporokpo. ¹⁸Ọ n̄uebechaa ya iphe ono; ọ bya edufu ndu ono, shi vuru iphe ono, ẹp̄hę t̄utaru ono. ¹⁹E rwuepho l'agwa, ọ-kube mkp̄ukpu Gilugalu; ọ ghakọbe lashia azu je asu: "Jiko eze; ọ d̄uru ozi, mu e-zi ngu lę mpya."

Eze ono sụ ndu-ozì iya: “Unu gebeeshikwa-o!” Ọo ya bụ; ẹphe tũko gbado iya tũgbua.

²⁰Noo ya; Ehudu bya ejekube iya ntse l'ẹka ọ nọ nkinyi iya l'ime mkpuru ụlo-eli ono, bụ ẹka ka ejidata ejidata; je asụ iya: “Ọ dũru ozi, shi Chileke l'ẹka mu eme gẹ mu zia ngu.” Eze gbalihuẹpho l'oshi, ọ nọ anọ; ²¹Ehudu gudeẹpho ẹkicha mifuta ogu-echi ono l'utapfu ọkpa ẹkutarara iya ono; woru iya nmaa eze ono l'ẹpho. ²²Ogu-echi ono bahũgbua ya l'ẹpho jeye l'ishi iya; ẹba rimia ogu-echi ono; k'ọphu bụ lẹ Ehudu bẹ haru iya amifuta. Akurepho kposhihu iya. ²³Tọbudu iya bụ; Ehudu bya abahu l'oma ụlo ono; woru mgbo k'ulo-eli ono gu-chishikota; guburu iya ye; woru iya tu-chishia. ²⁴Ọ tũgbuchaephō; ndu ejeru eze ono ozi bya eje ahuma lẹ mgbo ụlo-eli ono bẹ a tu-chishikotaru atũ-chishi; ẹphe sụ: “Ọobũkwaru unme bẹ ọtuta l'ime mkpuru ụlo-eli ono.” ²⁵Ẹphe nọdu kwabẹ gbiriri jasụ ọdu tsuru pẹ; ẹphe ghadashia; ọphu ọ tọ guhaduru pẹ ụzo. Ẹphe bya ewota ire-igodo tũhashia ụzo ono. Ẹphe bya ahuma nnajjuphu pẹ ono g'ọ dabyiru l'oma-ulo ono; nwũhuwaa anwũhu.

²⁶Ehudu bụ teke ono, ẹphe nọ kwabẹ pho bẹ o pyofuru gbalaa; shia ụzo ẹka ono, agwa nọ ono; gbaru lashia mkpũkpu Seyira. ²⁷Ọ gbarwuepho l'ẹka ono; ọ nọdu l'alì úbvú úbvú Ifuremu woru opu gbua; ndu Ízurelu wũru tsoru iya; a -gbẹ l'úbvú ono; yẹbedua vuta ụzo. ²⁸Ọ sụ pẹ: “Unu tso mu! Chipfu yeakwaru unu ndu ọhogu unu, bụ ndu Mówabu l'ẹka.” Ọo ya bụ; ẹphe wũru tsoru iya; je anọ-chishikota ẹnyimu Jiódanu l'ẹka dũkota chara chara, bụ ẹka eeshije gude ọkpa dafu mkpũkpu Mówabu; ọphu ẹphe ekwedu g'o nweru m'onye lanu a-dafu azu iya ọphuu. ²⁹Ẹphe gbua ndu Mówabu ono iphe, rwuru ụkporo unu nemadzu l'unu ise lẹ teke ono; mbu ndu bũkota mkparawa ọkpehu dũkota; ọphu ọ dudu m'onye lanu, nahuru nu. ³⁰Ndu Ízurelu lwuta ndu Mówabu lẹ mboku ono; ẹphe nọdu pẹ lẹ mkpula. Tọbudu iya bụ; alì ono nọdu lẹ nchì-odoo ụkporo apha ẹno.

Shamuga l'adzota ndu Ízurelu

³¹Ehudu bũghechaephō ishi; Shamuga, bụ nwa Anatu bya aburu ishi. Ọ buru yẹbedua gude mgboro chigbushia ndu Filisitayinu unu nemadzu l'ukporo umadzu iri. Yẹbedua bũkwapho onye dzoru ndu Ízurelu.

Debora mę Baraku adzota ndu Ízurelu l'ẹka ndu Kėnanu

4 ¹Tọbudu iya bụ; Ehudu nwũhuchaa; ndu Ízurelu meahaa ẹjo-ememe l'anya Chipfu ọzo. ²Chipfu woru pẹ ye Jiabinu, bụ eze ndu Kėnanu l'ẹka. Ẹka ọ nọ buru eze bẹ bụ lẹ mkpũkpu Hazo. Onye-ishi ndu ọhogu iya buru Sizera, onye bu lẹ mkpũkpu Haroshetu-Hagoyimu. ³Ọ gude kele o nweru ụgbo-inya, e meru l'ígwè; unu labo l'ukporo ise kpa ndu Ízurelu owechorochocho apha ụkporo. Tọbudu iya bụ; ndu Ízurelu raku nu Chipfu g'ọ gbaaru pẹ mkpu.

⁴Debora, bụ nwanyị epfuchiru Chileke; mbụ nyee Lapidotu bụ onye-ikpe ndu Ízurelu teke ono. ⁵Eka o shi anọduje bụ lẹ mkpula mpfụ Debora, nọ lẹ mgbaka mkpukpu Rama yele mkpukpu Betelu l'alì úbvú úbvú Ifuremu; ndu Ízurelu awụ ejefu iya g'o kpeeru phẹ ikpe. ⁶Oo ya bụ; ọ bya ezia e je ekua Baraku nwa Abinowamu, shi lẹ mkpukpu Kadeshi, nọ l'alì ndu Nafutali. Ọ sụ iya: “Chipfu, bụ Chileke ndu Ízurelu bẹ ziru ngu sụ g'i tughua je achita unwoke ndu Nafutali; mę unwoke ndu Zebulun ụkporo ụnu nemadzu l'unu ise yeru onwongu; duru phẹ g'unu shia ụzo úbvú Tabo. ⁷Mu e-me Sizera, bụ onye-ishi ndu ojogu Jiabinu; g'ọ chiru ụgbo-inya iya; yele ndu ojogu iya; bya l'enyimu Kishonu; mu eworu Sizera ye ngu l'eka.”

⁸Baraku sụ iya: “Ọ -buru l'ii-tsoru mu je; bẹ mu e-jekwa-a; teke i tii tso-du mu je bẹ mu tee jekwa.”

⁹Debora sụ iya: “Ọ dūepho ree; mu lẹ ngu a-swiru-a je; ọle úbvù, nọ l'iphe-a, ìbya ejeje-a bẹ taa buekwanuru nkengu. Ishi iya bụ l'oo nwanyị bẹ Chipfu e-me; l'o gude Sizera.” No iya; Debora gbalihu tsoru Baraku; ephe jeshia Kadeshi. ¹⁰Ọ buru lẹ Kadeshi bẹ Baraku rwukoberu ndu Zebulun waa ndu Nafutali ephe dọru. Ndu o gude jee bụ ụkporo ụnu nemadzu l'unu ise. Debora tsokwaru phẹ pho.

¹¹No iya; Heba, bụ onye Kénu, bụ iya bụ oshilokpa Hobabu, bụ nwune nyee Mosisu; bufu onwiya l'eka ndu Kénu nọ. Ọ tughua je eworu ụlo-ekwa iya kpobe l'upfu achi, nọ lẹ mkpukpu Zanimu, nọ lẹ mgboru alì Kadeshi. ¹²Tobudu iya bụ; epfuaru Sizera lẹ Baraku nwa Abinowamu bẹ jeshiakwaru l'úbvú Tabo; ¹³Sizera chitakota ụkporo ụnu ụgbo-inya igwè iya labo l'ụkporo ụgbo-inya igwè ise; mę unwoke, ephe l'iya nọ l'ophu; shi lẹ mkpukpu Haroshetu-Hagoyimu jeshia l'enyimu Kishonu.

¹⁴Noo ya; Debora sụ Baraku: “Ngwa! Ọo ntanu-a bẹ Chipfu woru Sizera ye ngu l'eka.” Sụ iya: “Chipfu vutahaakwaru ụzo.” Ọo ya bụ; Baraku chiru ụkporo ụnu ojogu labo l'ụkporo iri nyizetakota l'úbvú Tabo. ¹⁵Chipfu gude ogu-echi Baraku meru eberebete tų Sizera; mę ụgbo-inya iya l'ophu; waa ndu ojogu iya g'ephe ha. Sizera pfufuta l'ugbo-inya iya chie okpa l'oso. ¹⁶Baraku chipyabe ndu ojogu Sizera; mę ụgbo-inya phẹ jasụ ephe rwua Haroshetu-Hagoyimu. Ọ buru ogu-echi bẹ e gude gbushikota ndu ojogu Sizera. Ophu ọ dudu m'onye lanu, phoduru nụ.

JIAYELU EGBU SIZERA

¹⁷No iya; Sizera gude okpa gbaru lashia l'ulo-ekwa Jiayelu, bụ nyee Heba; onye Kénu. Ọ buru iphe, kparu iya nụ bụ lẹ Jiabinu, bụ eze ndu Hazo bẹ yele ndibe Heba, bụ iya bụ onye Kénu ono dų lẹ ree. ¹⁸Jiayelu gbagbua je agba Sizera ndzuta; bya asụ iya: “Nnajiuphu mu tokwa ehu! Gbabata! Ta atsushi ebvu!” Ọ gbapfu nụ iya l'ulo-ekwa ono; ọ bya eworu ekwa kpube iya. ¹⁹Ọ sụ iya: “Jiko kenaa mu mini ge mu ngua; kele egu

mini agụkwa mu.” O kpuaa iphe, ooyeje mini-ẹra-eswi; gbata iya nū iya; ọ ngua. Ọ bya ewokwaru ẹkwa ono kpuchia ya. ²⁰Ọ sū nwanyị ono: “Pfukwaru l'ọnu-abata ụlo-ékwa ono; k'ọphu bụ; ọ -duru onye byaru bya ajia ngu sụ: ‘?O nweru onye nọ l'ẹka-a?’ l'ii-sụkwanu iya: ‘Waawaa!’ ”

²¹Obenu lẹ Jiayelu, bụ nyee Heba gbẹ wota nggu, eegudeje kpọbe ụlo-ẹkwa; bya ewota ọngu; pyaa mpya jepfu iya; je egude ọngu ono kpọbe iya nggu ono l'ishi nchị. O foo ya bahụ l'alị; kele mgbenya tū-rwewaru iya atụ-rwe; teme ike bvushikwa iya phọ. Ọ bụru iya anwuhu. ²²A bya l'amaru; Baraku nọdu agbaghawaa l'ẹka ọochikwanu Sizera; Jiayelu lufuta gbapfuta iya; bya asụ iya: “Bya; ge mu goshi ngu nwoke ono, icho ono.” Tọbudu iya bụ; ọ bya etsoru nwanyị ono bahụ; bya ahuma Sizera g'ọ dabiruru nwuhuwaa anwuhu; nggu kpọru iya l'ishi-nchị.

²³Ọ bụru lẹ mbọku ono bẹ Chileke meru Jiabinu, eze ndu Kėnanu; ọ laa ndu Ịzurelu l'ẹka. ²⁴Ike ndu Ịzurelu bya akapyabẹ ke Jiabinu, bụ eze ndu Kėnanu ọkpobe akapyabẹ gbiriri jasụ ẹphe lwụ-kpee ya.

Ebvu, Debora yee Baraku guru

- 5** ¹Lẹ mbọku ono bẹ Debora yee Baraku nwa Abinowamu guru ebvu-a sụ:
- ² “Ndu-ishi ndu Ịzurelu vutaru ụzo ọgu;
ndu Ịzurelu l'ọphu gude obu phẹ tsoru phẹ;
unu jaa Chipfu ajaja!
- ³ Unu numa iphe-a; unubẹ ndu eze!
Unu ngabẹ nchị; unubẹ ndu-ishi!
Mu a-gụ ebvu nū Chipfu; mu a-gụ ebvu gụ-ku iya;
mbụ lẹ mu e-gude ebvu jaa Chipfu, bụ Chileke ndu Ịzurelu ajaja.
- ⁴ Gbẹ Chipfu; teke ị lufuru l'alị Siye;
mbụ teke ị zoru garamugaramu lufu l'alị ndu Edomu
bẹ mgboko nmahuru jijijijii;
igwe rwua erwurwu; wa mini.
- ⁵ Úbvú bẹ nmakotaru jijijijii l'iphu gbẹ Chipfu;
mbụ jeyekpo l'úbvú Sayinayi bẹ nmacharu jijijijii
l'iphu gbẹ Chipfu, bụ Chileke ke ndu Ịzurelu.
- ⁶ Lẹ teke ke Shamuga nwa Anatu; waa Jiayelu
bẹ a gwoberu eshi eze gbororo;
ndu ije pyoaha ntubo.
- ⁷ Iphe, bụ mkpukpu, nọ lẹ Ịzurelu dabyikotaru iphoro;
gbiriri jasuru Debora futa;
bya aburu ne ndu Ịzurelu.
- ⁸ G'ẹphe hataru agwa ọphúú; bẹ ọgu wataru ada l'alị Ịzurelu gbaa
mgburugburu;
ọphu ọ dudu mẹ iphe, eegudeje egbobuta onwonye; ọzoo arwa, a
humaru l'echilabọ ukporo unu nemadzu ise, nọ l'alị Ịzurelu.

- 9 Ndu-ishi ndu Ízurelu dü mu l'obu;
mbü ndu тұru obu phe onyo wofuta onwophe onoya.
Unu jaa Chipfu ajaja!
- 10 Unube ndu ono agba l'eli nkafu-igara ocha; a;
mbü unube ndu ono, no l'eli ukpo, a wukoberu l'eli nkafu-igara;
me unube ndu eje l'okpa;
- 11 unu geedukwa olu-ebvu ndu ono, agu ebvu l'eka eekutaje mini
ono.
Oo l'eka ono be epe a-nodu gu ebvu k'iphe, pfuru oto, Chipfu
mekotaru;
mbü iphe, pfuru oto, o mekotaru ndibe iya le Ízurelu.
Tobudu iya bu; ndibe Chipfu wufu jeshia l'onu-abata mkpukpu.
- 12 'Gbalihukpodapho! Debora gbalihu!
Gbalihu! Gbalihu! Chiswee ebvu!
Baraku; gbalihu!
Gube nwa Abinowamu; duta ndu i kpuru le ndzu.'
- 13 Tobudu iya bu; unwoke ophu phoduru nu wu-pfushia ndu-ishi.
Ndibe Chipfu wuru byapfuta mu g'anyi tsoo ndu okpehu du ugu.
- 14 Ndu Ifuremu, bu ndu ophu gbaru ogbarabvu l'ubvu ubvu Amaleku
wufuta tsoru gube Benjaminu; gu le ndibe ngu.
Ndu-ishi-ogogu, shi l'ali ndu Makiya wufutakwapho;
ndu shi l'ali Zebulun bu ndu gude mgboro onye-ishi-ogogu.
- 15 Ndu-ishi ndu Isaka; epe le Debora tuku swiru.
Nokwapho ge ndu Isaka l'onwophe wukwarupho tsoru Baraku;
gbazeta le nsuda ono.
Ophu obu anodu ndu Rubenu l'eka lanu.
- 16 ?Bu gunu be unu doru lodu aturu eme?
?Bu g'unu numa okwe onye eche aturu akpo gude ekukobe aturu iya
too?
Ndu Rubenu be agba egomunggo shii.
- 17 Ndu Giladu be kwaru l'azu enyimu Jiordanu.
?Bu gunu be ndu Danu gugaru kwaa l'ugbo-mini?
Ndu Asha kwaa l'aguga enyimu;
mbü lodu ugbo-mini.
- 18 Ndu Zebulunu mia enya le ndzu kweta onwu.
Nokwapho ge ndu Nafutali mikwarupho enya le ndzu bu ono;
mbü legu ugu ono.
- 19 Ndu eze byaru; epe lwua ugu ono.
Ndu eze ndu Kenu be lwuru ugu le mkpukpu Tanaku;
le mgboru mini mkpukpu Megido;
ophu epe alwutaduru me mkpola-ochaa.
- 20 Kpokpode be gbetchaa l'akpaminigwe alwu ugu;

- mbụ l'ephe shichaa l'eka ephe eshije; etso Sizera oḡu.
- 21 Ẹnyimu Kishonu tuko phẹ kpota;
mbụ ẹnyimu shi l'ichee ono, bụ iya bụ ẹnyimu Kishonu.
Gube obu mu; gude ike zoru je l'iphu!
- 22 No iya; igiji okpa inya nodu ada g'egbigwe.
Mbụ inya, okpehu du nodu agbagbaa ke kwaakwa.
- 23 Ojosi-imigwe, shi l'eka Chipfu suru: 'Unu taa mkpukpu Merozu
onu;
mbụ; unu taa phẹ ejo onu;
kele ephe ta abyaduru eyetaru Chipfu eka l'ogu;
mbụ yetaru Chipfu eka l'wua ndu ike du l'ogu.'
- 24 Ge Jiayelu; mbụ nyee Heba, bụ onye Kenu bukwaru onye aa-kachaa
agoru onu-oma nu l'iphe, bụ unwanyi;
g'o buru iya be aa-kachaa agoru onu-oma nu l'iphe, bụ unwanyi,
bu l'ulo-ekwa.
- 25 O rarụ ora mini; o nu iya mini-era-eswi.
Mbụ l'oo l'iphe, gbaru ndu eze be o yeru iya mini era-eswi.
- 26 O dzu-liru nggu ulo-ekwa;
bya egude ekutara palia ongu ndu-ozii;
kpobe iya Sizera l'ishi-nchi;
tsupyabe iya ishi l'ali; kpo-fua uzo.
- 27 O buru le mgboru okpa iya be o phozeru; dabyiru.
Mbụ l'oo le mgboru okpa iya be o phozeru dabyiru nwuhu.
O buru l'eka o phozeru ono be o daru; nwuhu.
- 28 Le windo be ne Sizera gbẹ pyofu enya.
O nodu l'onu-uzo ulo-eli ara ekwa su:
'?Bụ gunu kparu iphe, ugbo-inya anọ odu alwalwa?
'?Bụ gunu meru iphe, a ta nuda ukporo okpa ugbo-inya iya?'
- 29 Unwumboko ibe eze ndu ophu kachaa amaru iphe nodu azu eyeru
iya l'iphe, oofu;
teme yebedua nodu azukwa iya pho ekwe lonwiya.
- 30 Ephe nodu asuje iya: '?Tobudu iphe, ephe a-kwata l'okwata be ephe
achọ; bya ekekwa iya pho ekeke?
Nwoke nonu e-keta nwamgboko lanu; ozoo ebo.
Sizera eketachaa uwe, ama ntumatu;
mbụ l'oo-ketachaa uwe, ama ntumatu, akwaru k'erengete;
waa ekwa, du eguru, mu a-tu-phuje l'olu;
mbụ ?o bukataru iphe, a kwataru l'okwata?'
- 31 Ge ndu ohogu gube Chipfu lakota l'iyi egube ono.
Ole ge ndu yeru ngu obu gbukwa ke nwijnwii g'enyanwu, agbakota
agbakota."
- Tobudu iya bu; ali ono nweru nchi-odoo no ukporo apha labo.

Ndu Midiyanu akpa ndu Ízurelu ẹhu

6 ¹Ndu Ízurelu mekwa ejo-ememe l'iphu Chipfu ọzo. Chipfu woru pẹ yee ndu Midiyanu l'ẹka; ẹphe nọ pẹ l'ẹka apha ẹsaa. ²Ndu Midiyanu kpa pẹ ẹhu k'ọpẹ ẹphe laru l'úbvú je emeshia ọlo waa m̀kpú lẹ mgbaka mgbaka mkpuma; mẹ l'ogba; mẹ l'ẹka a kpushigbaaru ike je ebugbaaru. ³No iya; ọ nọdu abujeru teke ndu Ízurelu kọru opfu; ndu Midiyanu; mẹ ndu Amaleku; mewardu ndu buchaa l'uzo ẹnyanwu-awawa awuru bya etsoo pẹ ọgu naa pẹ iya. ⁴Ẹphe nọdu ejeje anmaa anmanma ọgu l'alì ono; tuko iphe, ẹphe meberu l'alì mebyishikọta; mbu mebyishikọta iya nno je akpa lẹ mkpukpu Gaza. Ọpẹ ọ dudu mẹ iphe, dzu ndzu, ẹphe ahajẹ lẹ Ízurelu; je akpachaa l'aturu; waa eswi; mẹ nkafu-igara. ⁵Ẹphe achijeru ẹku pẹ; waa ọlo-ekwa pẹ zeru gbiigbiigi g'igube; mbu k'ọpẹ a ta majeduru g'e-shi aguta pẹ l'ọgu ẹphe l'inya-kamelu pẹ; ẹphe abya aphunwua alì ono gbaa ya ophorokpo. ⁶Ndu Midiyanu ono mee ndu Ízurelu; ẹphe kwata daa ukpa okpobe adada. No iya; ẹphe bya araku Chipfu g'ọ gbaaru pẹ mkpu.

⁷Ọo ya bu; ndu Ízurelu rakuẹpho Chipfu lẹ k'iphe ndu Midiyanu eme pẹ ono; ⁸o zitaru pẹ onye mpfuchiru Chileke, bu onye pfuru ndu Ízurelu sù: "Waa iphe, Chipfu, bu Chileke ndu Ízurelu epfu baa: Ọo mu bu onye ono, dufutaru unu l'alì Ijiputu; mbu l'alì ono, unu shi buru ohu ono. ⁹Mu nafutaru unu l'ẹka ndu Ijiputu mẹ l'ẹka ndu shi akpa unu ẹhu; mu chishikotaru unu ndu ono l'alì pẹ; woru iya nù unu. ¹⁰Mu pfuaru unu sù l'ọ mbedua, bu Chipfu, bu Chileke unu. G'unu ta abakwaru agwa ndu Amoru eja l'alì ono, unu bu ono. Ọle unu te eyeduru mu ọnu."

¹¹Noo ya; ojozi-imigwe, shi l'ẹka Chipfu bya bya anọdu l'upfu achi, nọ lẹ mkpukpu Ọfura. Onye nwe achi ono bu Jiowashi, bu onye shi l'ipfu ndu Abiyeza. Nwatibe iya, bu Gidiyonu nọdu l'ẹka aazoshije mẹe l'akpuru vayinu; echishi witi g'o wohaa ya gẹ ndu Midiyanu ta ahuma iya. ¹²Ojozi-imigwe, shi l'ẹka Chipfu ono bya achaa Gidiyonu l'iphu bya asu iya: "Chipfu nokwa swiru ngu; gube ojogu, ike du."

¹³Gidiyonu sù iya: "Oowaa; nnajuphu mu; ọ -buru lẹ Chipfu nọ swiru anyi; ?bu gunu meru g'o gude iphe-a nọdu anwukotaru anyi? ?Denuhunu iphe-ohumalenyia iya ono, nna anyi pẹ kọru anyi ono; mbu l'ẹphe sùru: 'L'ọ Chipfu dufutaru anyi l'alì Ijiputu.' Ọle nta-a bẹ Chipfu ọbu gbẹ gwobewaa anyi; woru anyi ye l'ẹka ndu Midiyanu."

¹⁴No iya; Chipfu bya adakọbe sù iya: "Gude ike, i nweru je anafuta ndu Ízurelu l'ẹka ndu Midiyanu. Ọ kpokwaa mbedua gededede bẹ ezi ngu sù ngu g'i je."

¹⁵Gidiyonu sù iya: "Oowaa; nnajuphu mu; ?mu e-me ime-agma dzoo ndu Ízurelu? Humanu l'ọ kwa unuphu k'anyi bẹ ẹnya kachakpo alwalwa l'ipfu Manase; teme ọ buru mu bẹ kachaa alwa alì l'onulo ibe nna mu."

¹⁶ Chipfu sù iya: “Mu e-swiru ngu-a; mbù l'ìi-tùko ndu Midiyanu lwù-kpekòta g'èphe bù onye lanù.”

¹⁷ Gidiyònu yeeru iya ònu sù: “Ò -bùru lẹ mu dũwaa ngu l'obu; goshinu mu iphe, e-me gẹ mu maru l'ò bù-a gùbedua bẹ epfu eyeru mu nù. ¹⁸ Jiko ta atugbukwa l'ẹka-a jasù gẹ mu byapfuta ngu; gẹ mu je ewota iphe, mu a-nù ngu bya edoberu ngu l'atatiphu.”

Tòbudu iya bù; Chipfu sù iya: “Mu a-nòdu-a jeye ìilwa azù.”

¹⁹ Tòbudu iya bù; Gidiyònu bya abahù l'ùlo je eworu mkpi gbua shia; bya ewota ùtu iphe, egudeje eme buredi, jiru nkweka gheta buredi, e te yeduru iphe, ekoje buredi. Ò bya agushia anù ono ye lẹ nkata; wùru urwukurwuku iya ye l'itoshi. O gweta iya wojeru iya l'upfu achì ono. ²⁰ Ojozi-imigwe, shi l'ẹka Chileke ono bya asù iya: “Gweta anù ono; mẹ buredi ono dobe l'eli mkpuma-a; ìiwufutakwapho urwukurwuku iya ono.” Gidiyònu bya emekòta iya nno. ²¹ Tòbudu iya bù; ojozi-imigwe, shi l'ẹka Chipfu ono bya eworu ònonu mgboro, ò gude l'ẹka denyi l'anù yele buredi ono. Òku shi lẹ mkpuma ono gbanwuhu; kepyashìkota anù; mẹ buredi ono. Ojozi-imigwe, shi l'ẹka Chipfu ono phuhu.

²² Gidiyònu maerupho l'òo Ojozi-imigwe, shi l'ẹka Chipfu; ò rashia: “Nnajiuphu, bù Chileke mu-e! Alashìkwa mu-o! Kele ò kwa Ojozi-imigwe, shi l'ẹka Chipfu bẹ mu gude ẹnya mu hùma ono-o!”

²³ Chipfu sù iya: “G'èhu dũkwa ngu guu! Ta atsushi ebvu. Ì tii nwùhu-duro.” ²⁴ Tòbudu iya bù; Gidiyònu kpàaru Chipfu òru-ngweja l'ẹka ono; gùbe iya: “Chipfu bù èhu-guu.” Òru-ngweja ono bẹ nọpfo lẹ mkpukpu Òfura, nọ l'alì ndu Abiyeza byasù ntanù-a.

²⁵ L'enyashi mbòku onokwaphò bẹ Chipfu sùru iya: “Kpùta oke-eswi k'èbo l'eswi nna ngu; mbù òphu gbawaru apha ẹsaa. Je enwukpòshia ẹnya ẹka nna ngu agwajẹ Balù; gbutsushia itso Ashera, nọ iya l'agùga. ²⁶ Ì -mechaa g'ì kpàaru Chipfu, bù Chileke ngu òru-ngweja, dũkpoo rengu-rengu l'ẹka-a, ha l'eli-a. Ìi gbẹ teke ono kpùta oke-eswi k'èbo ono; chita itso Ashera ono, i gbutsushiru ono gude nkù iya gwee ngweja-akpò-òku.” ²⁷ Tòbudu iya bù; Gidiyònu bya achita ndu-ozì iya unwoke iri; bya emee gẹ Chipfu pfuru iya ono. Ò bùru l'enyashi bẹ o mekòtaru iphemiphe ono. Òphu o meduru iya l'eswe; kele ọotsu ndibe phẹ waa unwoke mkpukpu ono ebvu.

²⁸ Ndu mkpukpu ono lufutashia l'ònmewa utsu; bya ahùma l'a gbẹ me-yishikòtawa nù ẹka ephe agwajẹ Balù; gbutsushiwa itso Ashera, nọ l'agùga iya; bya eworu oke-eswi k'èbo ono kpòò òku l'eli òru-ngweja ono, a gbẹ kpùwaanu l'ẹka ono. ²⁹ Ndu mkpukpu ono bya ajjahaa: “?Bù onye meru iphe ọwa?” Ephe kpanyaa ishi; jikashinyaa; a sù phẹ l'ò kwa Gidiyònu nwa Jiowashi bẹ meru iya nù. ³⁰ No iya; ndu mkpukpu ono bya epfuaru Jiowashi sù iya: “Je edufuta nwa ngu. Òo-nwùhu; kele o tsukpòshiru ẹnya ẹka aagwajẹ Balù; bya egbutsushia itso Ashera, nọ l'agùga iya.”

³¹Iphe, Jiowashi pfuru ndu ono, nọ-pheru iya mgburugburu ẹhuka ẹhuka ono bẹ bụ: “?Unu agbaru Balu ọdzori? Tọo g'unu dzọo ya bẹ unu eme? Onye agbataru Balu bẹ ee-gbukwa l'utsu. O -buru-a lẹ Balu bẹ bụ ọkpobe agwa bẹ teke nemadzụ mebyishiru ọru-ngweja iya be ọo-du nū ike gbaaru onwiya ọdzori.” ³²O buru lẹ mbọku ono bẹ a guberu Gidiyonu “Jieru-Balu;” bụ iya bụ: “Gẹ Balu gbaa mkpu onwiya”; kele Gidiyonu bẹ tsukpọshiru ẹnya ẹka aagwajẹ Balu.

³³Tọbudu iya bụ; ndu Midiyanu l'ophu; mẹ ndu Amaleku; waa ndu bu-gbaa l'uzo ẹnyanwu-awawa bya atuko ndu ojogu pẹ dzukọbe; bya awufu azu ẹnyimu Jiọdanu azu iya ọphuu; je anmaa lẹ nsuda Jiezerelu. ³⁴Ọo ya bụ; Unme Chipfu bya eji Gidiyonu ẹhu; o woru opu gbua gude kukota unwu Abiyeza g'ẹphe tsoru iya. ³⁵O byakwapho eye ndu-ozu ẹphe zikota ozi l'alị ndu Manase l'ophu g'ẹphe kwaa ngwoğu; bya ekukokwapho ndu Asha; mẹ ndu Zebulun; waa ndu Nafutali; ẹphe wuru byapfuta pẹ.

³⁶Gidiyonu bya asu Chileke: “O -buru l'ii-shi l'eka mu dzọo ndu Izurelu ẹgube ono, i kweru mu ukwe iya; ³⁷lenu; mu a-kube eji aturu l'eka eechishije witi-a. O -buru l'oo l'iji aturu-a bẹ iji dashiru kpoloko; ọphu o tọ dashiduru l'oma alị l'ophu; mu amaru l'ii-shi-a l'eka mu dzọo ndu Izurelu ẹgube ono, i pfuru iya ono.” ³⁸No iya; o meepho ẹgube ono, Gidiyonu pfuru ono. O bya agbalihu lẹ nchitabohu iya je apyiya eji aturu ono mini; pyita iya mini, jiru gbamugbam, eku mini. ³⁹Tọbudu iya bụ; Gidiyonu su Chileke: “Jiko g'ehu-eghu ngu te ejekwa aburu oku dapfuta mu; gẹ mu rwofuna ngu iphe lanu. Gẹ mu gudeeshi eji aturu ono hutafua ama ugbo lanu. K'ogiya-a; mee g'iji aturu ono kpohukota nkụ; l'i mee g'iji dashikota l'oma alị l'eka ono.” ⁴⁰L'enyashi mbọku ono bẹ Chileke meeru iya pho ẹgube ono. Eji aturu ono kpoloko bẹ iji ta adashiduru; o dashikota l'oma alị l'ophu.

Gidiyonu alwu ndu Midiyanu

7 ¹O -rwua l'onmewa utsu; Jieru-Balu, bụ iya bụ Gidiyonu yee ndu ojogu iya l'ophu wu-lihu je anmaa anmanma ogu lẹ mgboru obvumini Harodu. Ndu Midiyanu doru lẹ nsuda, nọ l'uzo isheli ibiya ọphu ẹphebedua nọ; lẹ mgboru ubvu More.

²Chipfu bya asu Gidiyonu: “Ndu ojogu ngu bẹ hanukakwaru mu igwerigwe gẹ mu e-woru ndu Midiyanu ye pẹ l'eka. Iphe, ii-me nta-a gẹ ndu Izurelu ta anodushi epfuru mu l'oo ike pẹ bẹ ẹphe gude dzọo onwophe ³bụ g'i je araaru iya ẹphe arara nta-a su pẹ: ‘Teke o dukwaru onye ẹhu anmaa anmanma lẹ ndzu-agugu; g'onye obu shikwa l'ubvu Giladu-a lasha.’” No iya; ukporo unu nemadzụ ugbo labo l'unu iri l'ise zehu lasha; o buwaru ukporo unu nemadzụ l'unu ise bẹ phoduru nu.

⁴Obenu lẹ Chipfu pfuleru-a Gidiyonu su: “Ndu ono bẹ panukakwarupho igwerigwe. Chita pẹ je lẹ mini gẹ mu huchaaru ngu ẹphe ama l'eka

ono. Onye mu sūru l'oo-tsoru ngu je; bẹ e-je nū. Onye ọphu mu sūkwanuru l'o too tsoduru ngu eje bẹ te ejekwa.”⁵ Ọo ya bụ; Gidiyọnu duta ndu ono jeshia lẹ mini. Chipfu sū iya: “Dobe ndu ọphu gude ire angū mini gẹ nkūta angūje-a iche; l'i dobekwaphọ ndu ọphu gbushiru ikpere angū iya iche.”⁶ Ọ bụru ụmadzu ụkporo iri l'ise bẹ gude ẹka kwọta mini ono ye l'ọnu. Ndu ọphuu l'ọphu bẹ tūkoru gbushikọta ikpere g'ẹphe ngūta iya.⁷ No iya; Chipfu sū Gidiyọnu: “Ọo ụmadzu ụkporo iri l'ise ono, gude ẹka kwọta mini ye l'ọnu ono bẹ mu e-gude dzọo unu; mbụ woru ndu Midiyanu ye unu l'ẹka. Gẹ ndu ọphuu tūko lashichaa ibe phe.”⁸ Ọo ya bụ; ndu k'ọphuu vulia nri; bya achita opu-ọgu ndu k'ọphuu. Gidiyọnu sū phe g'ẹphe lashichaa unuphu. Ọ bụru ụmadzu ụkporo iri l'ise phọ bẹ ọ haru. Ẹka ndu Midiyanu dọru bụru l'uzo alị lẹ nsuda ẹka ono, Gidiyọnu phe dọru ono.

⁹ Ọ -rwua l'enyashi mbọku ono; Chipfu sū Gidiyọnu: “Gbalihu; je ada-tso ndu Midiyanu ọgu; kele mu wowaru phe ye ngu l'ẹka. ¹⁰ Ọ -būru l'iitsu ebvu eje phe etso ọgu; gẹ gū lẹ Pura, bụ onye-ozī ngu swīru je l'odu-ọgu phe ono. ¹¹ Ii-nūmawaro iphe, ẹphe epfu. I -nūmachaa ya bẹ oo-me-a g'obu shihu ngu ike g'i je ọgu l'odu ono.” Tọbudu iya bụ; yele Pura, bụ iya bụ onye-ozī iya ono swīru jerwua azū ẹka ndu ojogu ono dọru. ¹² Ndu Midiyanu ono; mẹ ndu Amaleku; mẹ ndu shikọta l'uzo ẹnyanwu-awawa tūko nmaa ẹrupfu g'igube lẹ nsuda ono. Inya-kamelu phe bụru agūta agūta; mbụ byierupho g'ẹja, nọ laguga eze-enyimu.

¹³ Gidiyọnu jerwua; bya ahuma gẹ nwoke lanu ezeru ọnyà iya nrwo, ọ rwo ru asūje iya: “Mu rwo ru nrwo g'ishi buredi, dū mgburugburu, e meru lẹ balị ewe kperekpere ewebata l'ẹka ndu Midiyanu nmaru anmanma ọgu. Ishi buredi balị ono weru bya asua l'ulo-ekwa; suta iya tuta; ọ daa gwoo; kpoo mkpomishaku.”

¹⁴ Ọo ya bụ; ọnyà iya ono sū iya: “Iphe-a ta adukwa iphe ọzo, ọ bụ; abudu ọgu-echi Gidiyọnu nwa Jiowashi, bụ onye Ịzurelu; kele Chileke woakwaru ndu Midiyanu waa ndu ojogu phe l'ọphu ye iya l'ẹka.”

¹⁵ Tọbudu iya bụ; Gidiyọnu numa nrwo ono, e zeru ono; waa iphe, ọ bụ; ọ bya abaru Chileke ẹja. Ọ bụru iya ala azū l'odu-ọgu ndu Ịzurelu; je asū phe: “Unu wu-lihu-o! Chipfu woakwaru ndu ojogu Midiyanu ye unu l'ẹka.” ¹⁶ Ọ bya eworu ụmadzu ụkporo iri l'ise ono kẹe uzi ẹto; bya eworu opu-ọgu nuchaa phe; wakwapho ite nshiji, duchaa iphoro, ọwá nochaa l'ime. ¹⁷ Ọ sū phe: “Unu lee mu ẹnya! Unu meje gẹ mu meru. Teke mu rwuerupho l'onu ẹka ono, ẹphe dọru ono; unu tsokwaru mu mejekpoephọ gẹ mu meru. ¹⁸ Teke mu lẹ ndu ọphu mu l'ẹphe swi gburu opu-ọgu; g'unubedua nodukwapho l'ẹka unu nọ gbaa ọdu phe ono mgburugburu gbua nkunu; chia mkpu sū: ‘A kwa ọgu-echi ke Chipfu waa Gidiyọnu-o!’”

¹⁹ Tọbudu iya bụ; Gidiyọnu yele ụmadzu ụkporo ise ono, ẹphe l'iya tūko swīru ono jerwua l'onu ẹka ono, ndu Midiyanu ono dọru ono lẹ teke a

watawaru eche nche k'echi abali. O buerupho teke ono be ndu ophu no le nche lufuru; ndu ozo bahuwaa le nche. Gidiyonu phe woru opu-ogu phe ono gbua; bya eworu ite nshii ono, ephe gudechaa l'eka pho tukposhia. ²⁰G'ephe hakota uzi eto ono woru opu-ogu nkephe gbua; bya atukposhi-chaai ite ono. Ephe pagbaaru owá pho lekicha; gudegbaa opu-ogu, ephe e-gbu lekutara; bya echishia su: "A kwa ogu-echi ke Chipfu waa Gidiyonu-o!" ²¹Onyenonu pfugbaaru lekia nkiya; ephe gbaphee aka ndu Midiyanu doru ono mgburugburu. Ndu Midiyanu ono l'ophu ye okpa l'oso; echi mkpu agba agbala. ²²Oo ya bu; ephe gbuepho opu-ogu ukporo iri l'ise ono; Chipfu mee onyemonye, no l'odu ndu Midiyanu ono wata egbu nwibe iya ogu-echi. Ndu ojogu ono gbaru lashia mkpukpu Betu-Shita; l'uzo mkpukpu Zerera; mbu gbaa gbarwua oke mkpukpu Abelu-Mehola, no-kube mkpukpu Tabatu.

²³Ndu Izurelu, shi l'okpa-ipfu Nafutali; me ipfu Asha; waa ipfu Manase be e kukotaru; ephe chipyabe ndu Midiyanu. ²⁴Gidiyonu ye ndu-ozii; ephe je ezidzuru iphe, bu ndu bukota l'ali ubvu ubvu ndu Ifuremu g'ephe wufuta je agbabua ndu Midiyanu iphu lenyimu Jiordanu; je akpakpo le mkpukpu Betu-Bara. Tobudu iya bu: e kukoo ndu Ifuremu l'ophu; ephe wufuta je anochia enyimu Jiordanu; je akpaa le Betu-Bara. ²⁵Oo ya bu; ephe gude ndu-ishi ndu Midiyanu umadzu ebo. Epha ndu-ishi labo ono bu Orebu waa Zeyebu. Orebu bephe gburu le mkpuma Orebu; gbua Zeyebu l'eka aakuje mee le mkpuma Zeyebu. Ephe nodu achikpoepho ndu Midiyanu ono; bya apata ishi Orebu waa Zeyebu palataru Gidiyonu l'eka o no l'azu enyimu Jiordanu.

Gidiyonu alwu ndu Midiyanu ophu phoduru nu

8 ¹Tobudu iya bu; ndu Ifuremu su Gidiyonu: "?Denu g'o gude i mee ya anyi egube-a? Mbui; ?denukpoo g'o gude ophu i ti kuduru anyi teke i jeru etso ndu Midiyanu ogu?" Ephe gbachae ya pho opfu agbagba ehuka ehuka.

²Gidiyonu su phe: "?Denu iphe, mu gbemee, ka ophu unu meru shii? ?O du g'akpa mkpakwa akpuru vayinu ke ndu Ifuremu ta akaduru ree; eme l'akpuru vayinu ke Abiyeza l'ophu?" ³Chileke be woru Orebu waa Zeyebu, bu ndu-ishi ndu Midiyanu ye unu l'eka. ?Denu iphe, mu gbemekpo, ka ophu unu meru shii?" O pfuchae pho iphe ono; obu jizeta phe.

⁴Gidiyonu yee umadzu ukporo iri l'ise pho bya erwua enyimu Jiordanu; bya aghabua ya aghabu. Teke ono be ike buushichakpowaru phe ree; ole ephe achiepho ndu ohogu phe ono kpabe kpabe. ⁵Ephe rwua mkpukpu Sukotu; o su ndu mkpukpu ono: "Jiko unu nunu ndu ojogu mu nri le mbá atukwa phe atutu. O kwa Zeba waa Zalumuna, bu ndu eze ndu Midiyanu be anyi achii oso."

⁶No iya; ndu-ishi Sukotu ono su iya: "?Unu gudeakwanaru Zeba yee Zalumuna obu meru g'o gude anyi je anu ndu ojogu ngu nri?"

⁷Tɔbudu iya bụ: Gidiyọnu sụ phẹ: “Ọ ɗa ree; teke Chipfu woerupho Zeba yee Zalumuna ye mu l'eka be bu ogara-mbo, shi l'echiegu; waa obyambvu be mu e-gude lakashia anu unu alakashi.” ⁸Ọ bya agbe l'eka ono jeshia mkpukpu Peniyelu; bya eje arwokwa phe pho nno; ephe pfukwapho ge ndu Sukotu pfuru pho. ⁹Oo ya bu; o sụ ndu Peniyelu: “Mu lwu-kpee l'ogu ono lwajeeepho alwalwa; be mu e-tsukposhi ulo-eli unu-a.”

¹⁰Zeba waa Zalumuna be no le mkpukpu Kako ephe le ndu ojogu phe, du ukporo unu nemadzu l'unu iri l'esaa l'ukporo nemadzu iri, bukota ndu ojogu, e gbuphodoru le ndu ojogu, shi l'uzo enyanwu-awawa. Ndu ojogu ono be e gbuwaru ukporo unu nemadzu ugbo iri l'ise, bukota ndu pagbaa ogu-echi. ¹¹Gidiyọnu bya eje eshia uzo ndu ije eshije; l'uzo enyanwu-awawa mkpukpu Noba waa mkpukpu Jiogbeha; je etsoo ndu ojogu ono ogu le teke ephe tuzohuru ehu. ¹²Eze ndu Midiyanu ono ephenebo, bu iya bu Zeba yee Zalumuna ye okpa l'oso; a chia phe je egude; bya edukaa ndu ojogu phe.

¹³Gidiyọnu, bu nwa Jiowashi lwajeeepho ogu ono o shia uzo ubvu Hesusu. ¹⁴Oo ya bu; o gude nwokoro lanu, shi le mkpukpu Sukotu bya ajiahaa ya aji. Nwokoro ono deshianu iya epha ndu-ishi waa ndu bu ogerenya mkpukpu Sukotu; deta umadzu ukporo eto l'iri l'esaa. ¹⁵Tɔbudu iya bu; Gidiyọnu bya ejepfu ndu mkpukpu Sukotu ono je asu phe: “Wakwa Zeba yee Zalumuna ba; mbu ndu ono, unu shi epfuru mu kwaphukwaphu su: “?Mu gudeakwanaru Zeba waa Zalumuna; meru g'o gude unu je anu ndu ojogu mu, ike bvushiru nri g'ephe ria-a?”” ¹⁶No iya; o bya akpukoo ndu bu ogerenya mkpukpu Sukotu; gude ogara-mbo, shi l'echiegu; waa obyambvu gude nua phe aphu. ¹⁷Ọ bya etsukposhia ulo-eli ndu mkpukpu Peniyelu; bya egbushikwaapho ndu mkpukpu ono.

¹⁸Tɔbudu iya bu; Gidiyọnu bya ajia Zeba waa Zalumuna sụ phẹ: “?Bu egube ndu gunu be unu gbushiru l'ubvu Tabo?”

Ephe sụ iya: “?Ọ kwa unwoke, dukotaepho g'unubedua; mbu l'onye ophu nonu duchaepho ge nwa onye eze.”

¹⁹Gidiyọnu sụ phẹ: “Ndu ono be bukotakwa unwune mu; mbu l'ephe bukota unwoke, ne mu nwushiru. Eshinu Chipfu no ndzu g'o no iya-a; be mu tege egbukwa unu ome unu doberu phe ndzu.” ²⁰Oo ya bu; o sụ okpara iya, bu Jieta g'o gbushia phe. Ophu o dudu ike milia ogu-echi iya gbua; kele o bunukaru nwatanshii; ndzu nodu agu iya.

²¹Tɔbudu iya bu; Zeba waa Zalumuna sụ iya: “Gbalihu; bya egbua anyi lonwongu. Oo ge nwoke ha bu g'ike iya ahaje.” Oo ya bu; Gidiyọnu zilihu; woru phe gbushia; bya anyafuchaa inya-kamelu phe iphe, e gude mee phe ona, bu iphe, e shi nyabechaa phe l'olu.

²²E mechaa; ndu Izurelu sụ Gidiyọnu: “Buru Onye-ishi anyi; gu le nwa ngu; me nwanwa ngu; eshinu o bu ngu dzotaru anyi l'eka ndu Midiyanu.”

²³Gidiyọnu sụ phẹ: “Mu taa bukwaru onye-ishi unu; ophu nwa mu abukwaru onye-ishi unu. O kwa Chipfu a-buru Onye-ishi unu.” ²⁴Ọ sụ phẹ:

“Iphe lanụ, mu arwọ unu bụ g'onyenonu nuchaa mu iphe-nchị, yị l'iphe, ọ kwataru l'okwata.” Ndu Midiyanu eyeje iphe-nchị; noo kele ephe bụ ndu ke Ishimelu.

²⁵ Ephe yee onu su: “Anyi e-gudekpoo ehu-utso nu ngu iya.” Ephe bya eworu ekwa phushi l'ali; onyenonu wotachaa iphe-nchị, yị l'iphe, ọ kwataru l'okwata chie l'ekwa ono. ²⁶ Iphe-nchị mkpola-ododo ono, ọ suru g'ephe nu iya ono be erwa iya ha g'unu ekpa mkpola-ododo eno l'ukporo ekpa mkpola-ododo ise; a -gufukwa iphe, e gude eme ome mma; me iyagbaolu; me uwe uswe, ndu eze ndu Midiyanu eyeje; waa gwogirigwo, ndu eze ono nyabechaaruu inya-kamelu phe l'olu. ²⁷ Gidiyonu gude iphe-nchị mkpola-ododo ono kputa uwe-ukuvu; dobe iya onu le mkpukpu iya ono, bu Ofura. Ndu Izurelu bya agwaahaa ya; gude pharwushiahaa onwophe. O bya aburu onya; nmata Gidiyonu yee ndibe iya.

²⁸ Oo ya bu; ndu Izurelu bya akapyabe ndu Midiyanu; ophu ndu Midiyanu egbelibaeduru ishi ozobaa. Le teke Gidiyonu no ndu be ali ono bukotaru le nchi-odoo ukporo apha labo.

Anwuhu Gidiyonu

²⁹ Jieru-Balu, nwa Jiowashi bya alaa ibe iya je eburu. ³⁰ O nwutaru unwoke ukporo eto l'iri; kele o luru unwanyi igwerigwe. ³¹ O nwekwarupho nwanyi, o to ludu okpobe alulu, bu le mkpukpu Shekemu. Yebedua nwutaru iya nwa nwoke lanu. Iphe, o guru nwata ono bu Abimeleku. ³² Gidiyonu, nwa Jiowashi nwuhu teke o kahwaru okpobe akahu. E lia ya l'ilu nna iya, bu Jiowashi le Ofura, bu iya bu mkpukpu ndu Abiyeza.

³³ Anwuhu, Gidiyonu anwuhu; ndu Izurelu dakobe wata apharwushi onwophe; mbu wata abaru Balu, nogbaa l'ali ono eja. Ephe woru Belu-Beritu dobe; o buru agwa phe. ³⁴ Ophu ephe anyataeduru Chipfu, bu Chileke phe ono, bu iya dzotakotaru phe l'eka ndu ohogu phe mgburugburu egede ono. ³⁵ Ophu ephe emejeduru ndibe Jieru-Balu, bu iya bu Gidiyonu ree le ke ree ono, o mekotaru ephebe ndu Izurelu ono.

Ejo-idzu, Abimeleku chiru

9 ¹ Tobudu iya bu; Abimeleku nwa Jieru-Balu gbeshi bya ejeshia le mkpukpu Shekemu l'ibe nwune ne iya phe; jekota l'iphe, bu ipfu ke ndu ne iya je asu phe: ² “Unu jikotakpoo iphe, bu ndu Shekemu su phe: ‘Bu ole karu unu ree? Bu g'unwu Jieru-Balu umadzu ukporo eto l'iri ono buru onye-ishi unu; to? g'onye lanu buru onye-ishi unu?’ Ozo bu g'unu nyatakwapfo le mu bu okpu, shi unu lehu waa mee unu.” ³ Ndu ne iya ono je eworu iphe ono pfukotaru iphe, bu unwoke ndu Shekemu; o buru iphe, okpoma phe nataru bu g'ephe tsoru Abimeleku; kele ephe pfuru su: “Oo nwune anyi be obu.” ⁴ Ephe bya anu iya ukporo mkpola-ochaa eto le mkpola-ochaa iri, shikota l'ulo agwa phe ono, bu Belu-Beritu. Abimeleku

bya egude mkpola-ochaa ono bukọo ndu ogalemkpa waa ndu eme gaphu-gaphu-gaphu; ephe wuru tsoahaa ya. ⁵Ọ bya ejeshia l'ibe nna iya ẹ mkpukpu Ọfura; je egbushikọta unwunna iya ono, bu iya bu unwu Jieru-Balu ono, du umadzu ukporo ẹto l'iri ono l'eli mkpuma lanu. Oo ẹpho Jiọtamu, bu iya kachakpoo aburu nwata l'unwu Jieru-Balu ono be bu onye phoduru nu; kele o jeru edomia onwiya. ⁶No iya; ndu Shekemu mekpoo ndu mkpukpu Betu-milo je atuko dzukobe l'upfu achi, no ẹ mgboru itso, du nso, bvuru ẹ Shekemu; woru eze mee Abimeleku.

⁷G'e pfuerupho Jiọtamu iphe ono, ẹphe meru ono; o je enyihu mkpakponu ubvu Gerizimu; raaru phe iya arara su: "Unube ndu Shekemu; unu ngabekpodaru mu pho nchi-o; k'ophu Chileke a-ngabekwarupho unu nchi! ⁸Su-a; o nweru teke oshi gbeshikotaru jeshia ahota oshi, a-buru eze phe. Ephe pfuaru oshi olivu g'o buru eze phe. ⁹Oshi olivu su phe: '?Mu a-paru manu mu haa, bu iphe, eegudeje akwabe Chileke me nemadzu ubvu bya eletaha oshi l'ophu enya?' ¹⁰Ephe bya epfukwaarupho oshi figu g'o buru eze phe. ¹¹Oshi figu su phe: '?Mu a-paru eguru akpuru ono, mu amije ono, atsoje ntumatu ono haa bya eletaaha oshi l'ophu enya?' ¹²Tobudu iya bu; ẹphebe oshi ono bya asu vayinu g'o buru eze phe. ¹³Vayinu su phe: '?Bu ge mu paru mee mu, emeje g'obu tso Chileke waa nemadzu utso ono haa bya eletaaha oshi l'ophu enya?' ¹⁴E mechaa; oshi ono g'ephe ha su ge ogara-mbo bya aburu eze phe. ¹⁵Ogara-mbo su phe: 'Teke o du unu ge mu buru eze unu; unu wubata nu ẹ mkpula mu bya ezee ndzu; o -dudu; g'oku shikwa ẹ mube ogara-mbo bya ekepyashikota iphe, bu oshi sida, nokota l'ubvu Lebanonu!' "

¹⁶Noo ya; Jiọtamu su phe: "O -buru l'oo iphe, gbaru unu be unu meru ono; mbu o -buru l'oo ree be unu meru ono; woru Abimeleku mee eze; mbu-a; o -bukpooru l'oo iphe, duta aduta be unu meru Jieru-Balu yee ndibe iya ono; mbu o -bukpooru l'oo egube, o gbaru g'unu mee ya ya be unu meru iya ya ono; ¹⁷mbu nna mu ono, lwuru unu ogu; taa ishi ndzu iya; dzota unu l'eka ndu Midiyanu ono; ¹⁸be o gbetchia rwua ntanu owa; unu gbete tsopyabe ndu unuphu ibe nna mu ono; woru unwu iya ukporo umadzu ẹto l'iri gbushia l'eli mkpuma lanu. Unu bya eworu Abimeleku, bu nwatibe ohu, nna mu gbataru agbata mee eze ndu Shekemu; kele o bu nwune unu. ¹⁹O -buru l'oo iphe, gbaru unu be unu meru ono; mbu o -buru l'oo ree be unu meru Jieru-Balu yee ndibe iya ẹ ntanu-a; ge Abimeleku bukwaru unu ehutu; unubedua abukwarupho yebedua! ²⁰Teke o to dudu; g'oku shikwa l'ehu Abimeleku bya ekepyashia unube ndu Shekemu waa ndu Betu-milo; g'oku shikwapo l'ehu unube ndu Shekemu; waa ndu Betu-milo bya ekepyashia Abimeleku!" ²¹Noo ya; Jiọtamu pfuchaa nno; bya agbalaa lashia mkpukpu Biye je ebuwaruro l'eka ono; kele ootsu nwanna iya ono, bu Abimeleku ebvu.

²²Abimeleku buru onye-ishi ndu Izurelu noo apha ẹto; ²³Chileke zia ejo maa; o je anodu l'echilabo Abimeleku yele ndu Shekemu; ẹphe

meahaaru Abimeleku gheleghelehele. ²⁴Ọ buru Chileke meru ge ndu Shekemu meje nno; g'ee-shi g'a pfa Abimeleku ugwo ejo-iphe ono, o meru unwunna iya ono; mbu g'a gwata iya ugwo ochi unwu Jieru-Balu, du umadzu ukporo eto l'iri; mbu unwunna iya ono, o gbushiru ono. Aagwatakwapo ndu Shekemu, bu ndu yetaru Abimeleku njo aka g'o gbushia unwunna iya ono ugwo ochi phe. ²⁵Tobudu iya bu; ndu Shekemu bya eye ndu jeru akwakaaru iya l'eli ubvu, nogbaa l'eka ono g'ephe mekata iya. Ọ nodu abujeru onye ghatakporu l'uzo ibe iya ono; ephe anaa ya nfu. E je agbaaru Abimeleku ama.

²⁶Noo ya; Galu, bu nwa Ebedu gbeshi duta unwunna iya; ephe wuru jeshia Shekemu. O jerwua; ndu Shekemu woru onwophe ye iya l'eka okpobe eyeye. ²⁷Ephe bya awufu jeshia l'egu je awokoo akpuru vayinu l'opfu-vayinu phe. Ephe wokobechara ya; bya azoshia mee l'akpuru vayinu ono wata abo obo-iphe l'ulo agwa phe. Ephe nodu eri; bya angu; teme ephe nodu epfubyishikwapo Abimeleku. ²⁸Tobudu iya bu; Galu nwa Ebedu su: “?Bu onye be Abimeleku bunu-a? ?Bukpoo gunu aa-kpata g'anyi be ndu Shekemu nodu iya l'eka? ?O kwa l'oo nwatibe Jieru-Balu be o bu? Mbu ?to budu Zebulu be etsota iya nu l'aburu ishi? Unu jechiaru ndu Hamo, bu iya bu nna ndu Shekemu ozi! ?Bu gunu aa-kpata g'anyi bya ejeahaaru Abimeleku ozi? ²⁹O du g'a sukwanu le ndu-a be no mu l'eka! Mu gege emegheana ke Abimeleku. Mu gege asu Abimeleku go kwakobe ndu ojogu iya gude lufuta!”

³⁰No iya; Zebulu, bu onye-ishi mkpukpu ono numaepho iphe ono, Galu nwa Ebedu pfuru ono; o voru oku wua ehu. ³¹O bya ezia ndu-ozu iya le mpya; ephe je ezia Abimeleku ozi su iya: “Lenu; Galu nwa Ebedu be yele ndu unuphu ibe phe byaakwaru Shekemu. Ephe tukoa kwa iphe, bu ndu mkpukpu-a kpalia g'ephe tso ngu opfu. ³²Oo ya bu; iphe, ii-me nta-a bu g'i gbeshi l'enyashi; waa ndu ophu gu l'ephe no; je akwakachaa l'ime egbudu. ³³O -beepho l'utsu; mbu me enyanwu -waepho; unu gbeshi je etsoo mkpukpu ono ogo. Galu yee ndu ono -byatashia g'ephe tso ngu ogo; mee phe g'eka ha ngu.”

³⁴Oo ya bu; o be l'enyashi; Abimeleku yele ndu ojogu iya l'ophu kee onwophe uzi eno; je akwakachaa l'aguga mkpukpu Shekemu. ³⁵No iya; Galu nwa Ebedu gbeshi je apfuru l'onu aka eeshije abahu le mkpukpu ono. Abimeleku yele ndu ojogu iya shichaa l'eka ono, ephe domishiru onwophe ono wufuta. ³⁶Galu humae phe pho; o rashiaru Zebulu su: “Lenu-o! Ndu nemadzū shikwa l'eli ubvu awu abya!”

Zebulu su iya: “Oo onyonyo ubvu ono be i humaru; o gbē duchaa ngu nu g'o bu nemadzū.”

³⁷Galu bya epfukwaa ya pho ozo su: “Ophu lekpodapho; ndu nemadzū shikwa l'echilabo mkpukpu eje abya; teme o dukwarupho ndu ophu shi l'uzo upfu achu ndu jibya eje abya.”

³⁸Zebulu sù iya: “?Dènuhunú ònù onò, ì shì apashì-a; mbù ònù, ì gude sù: ‘?Bù onye bẹ Abimèlèkù bù kẹ g'anyi bya ejeahaaru iya ozi-a?’ ?Tòbunaa ndu-a bẹ ì shì epfutoşhi-a? Jenù je adatso phẹ ọgù!” ³⁹No iya; Galu bya eduta ndu Shẹkemu; ephe je etsoo Abimèlèkù ọgù. ⁴⁰Abimèlèkù chĩa phẹ ọso; ephe ye ọkpa l'oso. Igwerigwe ndu ojọgù kẹ Galu dachaa iko; mekachaa iphe-ẹhuka. Ephe daephe ọpọpọ jasu l'ọnù ẹka eeshije abahù lẹ mkpukpu onò. ⁴¹E mechaa; Abimèlèkù lashia mkpukpu Aruma je anọdu. Ọ buri Zebulu bẹ chifuru Galu yẹle unwanna iya onò lẹ Shẹkemu. ⁴²Tòbudu iya bù; ọ bya ebekwa lẹ nchitabọhù iya; ndu Shẹkemu bya ejeshikwaa l'ẹgù; e je epfuaru iya Abimèlèkù. ⁴³Ọo ya bù; ọ chĩa ndu ojọgù iya; woru phẹ kẹẹ uzi ẹto; ephe je akwakachaa l'ẹgbudu l'ẹgbudu. O lepho ẹnya; hùma gẹ ndu Shẹkemu shi lẹ mkpukpu onò awù abya; ọ gbeshia datso phẹ ọgù; woru phẹ gbushia. ⁴⁴Tòbudu iya bù; Abimèlèkù waa ndu ọphu yẹ ya swì bya awufu-kebe jeshia l'ibiya k'ọnù ẹka eeshije abahù lẹ mkpukpu onò. Uzi labọ k'ọphuu wufu je adatso ndu Shẹkemu ndu ọphu nọ l'ẹgù phọ ọgù; woru phẹ gbushia. ⁴⁵Lẹ mbọkù onò l'ọphu bẹ Abimèlèkù lwukotarù ọgù lẹ mkpukpu onò. Ọ lwuta iya; gbushia ndu bu iya nù; mebyishikọta mkpukpu onò; bya eworù únú ghakọta iya.

⁴⁶Ndu bu l'ùlo-eli onò, nọ lẹ Shẹkemu onò nùmaphe iphe onò; ephe wubakota l'ime ẹka a kpushiru ike leze ọlo agwa, bù Elu-Beritu. ⁴⁷No iya; ama bya agbaarù Abimèlèkù lẹ ndu bu l'ùlo-eli Shẹkemu bẹ kùkòbekwaru l'ẹka lanù. ⁴⁸Ọo ya bù; Abimèlèkù waa ndu ọphu yẹ ya swì bya ejeshia úbvú Zalumonu. Ephe rwua l'ẹka onò; Abimèlèkù bya egude ogbunkù gbukwoshia nkù; chĩa tụa l'ukuvu. Ọ bya asù ndu onò, yẹ ya swì onò: “Ngwa! Iphe, unu hùmaru, mu meru; unu mee egube onò!” ⁴⁹Noo ya; onyenonù bya ebukọo nkù; vuta tsoru Abimèlèkù. Ephe je eworù iya doo l'ime ẹka onò, a kpushiru ike onò; mbù l'eli ndu nọ l'ime iya onò; woru ọkù tua ya. Ọkù tsua ọlo-eli onò; kegbushikọta ndu nọ iya nù, rwuru unu ọmadzù labọ l'ukporo ọmadzù iri; unwoke mẹ unwanyi. Ephe nwushihukota.

Anwùhù Abimèlèkù

⁵⁰E mechaa Abimèlèkù bya ejeshia mkpukpu Tebezu; je ekephee mkpukpu onò; lwuta iya. ⁵¹Ọle o nwekwanurù ọlo-eli, a kpushiru ike nọ lẹ mkpukpu onò. Ọ buri l'ẹka onò bẹ unwoke mẹ unwanyi; mbù ndu bukọta lẹ mkpukpu onò gbaru la je anọdu. Ephe gu-chishikọta onwophe l'ime iya; bya awurù lashia l'ime mkpotsu ọlo-eli onò. ⁵²Abimèlèkù bya ejeshia l'ùlo-eli onò g'o tsoo ndu nọ ya nù ọgù. O rwutashia ọnù-abata ọlo-eli onò ntse g'ọ tufu iya ọkù; ⁵³nwanyi lanù l'ime ndu onò, nọ l'ùlo-eli onò pataephe nggu-mkpuma uswe woru tụa Abimèlèkù l'ishi; woru iya ọkpu ishi tųpyashia atųpyashì. ⁵⁴Ọ bya ekukebe nwokorọbya, achijeru iya ngwọgù iya sù iya: “Mita-kebe ogu-echi ngu gbugbua mu; k'ọphu ephe taa

anọdudu epfu sụ: ‘Ọ kwa nwanị bẹ gburu iya nū.’ ” Ọo ya bụ; onye-ozì iya ono wota ogu-echi sụ ya; ọ nwụhu. ⁵⁵Ndu Ízùrẹ̀lu hùmaepfo lẹ̀ Abimeleku bẹ̀ nwùhuwaru nù; onyenonu tughbuchaa lashia unuphu.

⁵⁶Ọ̀ bụru egube ono bẹ̀ Chileke shiru gwata Abimeleku ugwo ejo-ìphe ono, o meru nna iya ono; mbụ k'ùnwunna iya, dū ụkporo ẹ̀to l'iri, o gbu-shiru ono. ⁵⁷Chileke bẹ̀ mekwarupho g'ejo-ìphe, ndu Shẹkemu meru ono tukoru pẹ̀ l'ishi. Onu ono, Jíótamu nwa Jieru-Balụ tūru bẹ̀ mechaa nwụa l'ẹ̀hu pẹ̀.

Tola; onye-ikpe ndu Ízùrẹ̀lu

10 ¹No iya; gẹ̀ Abimeleku buchaaru onye-ikpe ndu Ízùrẹ̀lu; bẹ̀ onye ọ̀zo shi l'okpa-ìpfu Isaka byaru afuta g'ọ̀ dzọta ndu Ízùrẹ̀lu. Epha nwoke ono bụ Tola; nwa Puwa; mbụ nwanwa Dodo. Eka o bu bụ lẹ̀ mkpukpu Shamiru, nọ l'alì úbvú úbvú ndu Ifuremu. ²Ọ̀ bụru onye-ikpe ndu Ízùrẹ̀lu ụkporo apha l'apha ẹ̀to; bya anwùhu; e lia ya lẹ̀ mkpukpu Shamiru.

Jiayi; onye-ikpe ndu Ízùrẹ̀lu

³Jiayi, bụ onye Giladu bya etsota iya; bya ekpeeru ndu Ízùrẹ̀lu ikpe ụkporo apha l'apha labo. ⁴Ọ̀ nwuta unwoke ụkporo l'iri. Unwu iya ono nọdu agbakota nkafu-igara l'ẹ̀hu l'ẹ̀hu. Onye ophu nonu; nwechaaru mkpukpu nkiya l'alì Giladu. Mkpukpu ono g'ọ̀ hakota bẹ̀ aza Havotu-Jiayi byasụ lẹ̀ ntanụ. ⁵E mechaa; Jiayi nwùhu; e lia ya lẹ̀ mkpukpu Kamonu.

Jieřuta; onye-ikpe ndu Ízùrẹ̀lu

⁶Ndu Ízùrẹ̀lu bya emee ejo-ememe l'ẹ̀nya Chipfu ozobaa; mbụ baaharu agwa Balụ eja; mẹ Ashitoretu; mẹ agwa ndu Aramu; mẹ agwa ndu Sayidonu; mẹ agwa ndu Mowabu; mẹ agwa ndu Amonu; waa agwa ndu Filisitayinu. Epe parụ Chipfu haa; ophu epe ta abajeeduru iya eja. ⁷Oke ehu-eghu Chipfu dafuta nū ndu Ízùrẹ̀lu. Chipfu nwuru pẹ̀ ye ndu Filisitayinu waa ndu Amonu l'eka. ⁸Epe mekpaa pẹ̀ ehu; gwee pẹ̀ arakabya l'apha ono. Apha iri l'esato bẹ̀ epe mekpakotaru ndu Ízùrẹ̀lu, bukota l'uzo enyanwu-awawa enyimu Jíodanu ehu; mbụ l'alì Giladu, nọ l'alì ndu Amoru. ⁹Ndu Amonu bya adafu azụ enyimu Jíodanu azụ iya ophuu g'ephe je adatso ndu Jiuda; mẹ ndu Benjiaminu; waa unwu Ifuremu ogu. Ọo ya bụ; ndu Ízùrẹ̀lu nọdunu l'oke iphe-ehuka.

¹⁰Tobudu iya bụ; ndu Ízùrẹ̀lu bya araku Chipfu; sụ iya: “Anyi meswea-kwaru ngu; kele anyi parụ gube Chileke anyi haa; je abapheahaaru agwa, bụ Balụ eja.” ¹¹No iya; Chipfu sụ pẹ̀: “?Tọ̀ bunu mu-a bẹ̀ dzotaru unu l'eka ndu Ijiputu; mẹ ndu Amoru; mẹ ndu Amonu; mekpoo ndu Filisitayinu? ¹²Mekpoo teke ndu Sayidonu; mẹ ndu Amaleku; waa ndu Mawonu shi akpaya unu ishi ono bẹ̀ unu rakuru mu gẹ̀ mu gbaaru unu mkpu; mu

dzota unu l'eka phe. ¹³Unu gbę parụ mu haa je abapheahaaru agwa eja. Eshinu o du nno be mu ta abyakwa adzotabaa unu ozo. ¹⁴Unu tugbua jenu araku agwa, bu ophu unu hataru g'ephe bya dzota unu teke unu no l'iphe-ehuka!" ¹⁵Tobudu iya bu; ndu Izurelu su Chipfu: "Anyi meakwaru iphe-eji. Mee anyi iphe, dukpoe ngu pho ree. Ole-a; jiko dzonaa anyi ntanu-a." ¹⁶Tobudu iya bu; ephe wofukota agwa ndu ohozo ono, ephe dobechaaru ono; bya abaaharu Chipfu eja. Aphu, ndu Izurelu no ono rwutabe iya l'ehu k'ophu o to duedu ike taa nshi.

¹⁷No iya; a bya ekukoo ndu Amonu k'ogu; ephe je anmaa anmanma ogo l'alị Giladu. Ndu Izurelu bya edzukobekwapho; je anmaa anmanma ogo le mkpukpu Mizupa. ¹⁸No iya; ndu-ishi Giladu su nwibe phe: "Onye vukporu uzo je etsoo ndu Amonu ogo be bu onye ono a-buru onye-ishi ndu Giladu l'ophu."

11 ¹Jiefuta, bu onye Giladu be bu onye ojogu ike du; ole o bu nwati-be nwanị ukpara. Nna Jiefuta be bu Giladu. ²Unyomu Giladu be nwushiru iya unwu. O be teke unwegirima unyomu iya ono byaru evushichaa; ephe chifu Jiefuta su iya: "I tii ketakwa oke l'unuphu ibe anyi; kele oo nwanị ozo be nwuru ngu nu." ³Tobudu iya bu; Jiefuta gbafuru unwune iya ono gbaru lashia alị Tobu je eburu. O buru l'eka ono; ndu ogalemkpa wu-pfuta iya bya etsoahaa ya.

⁴A nonyaa; ndu Amonu bya etsoo ndu Izurelu ogo. ⁵O buru teke ono, ndu Amonu tsoaharu ndu Izurelu ogo ono be ndu bu ogerenya ndu Giladu tugburu je eku Jiefuta l'alị Tobu; ⁶su iya: "Bya bya aburu onye-ishi anyi; k'ophu anyi a-du ike datsoo ndu Amonu ogo."

⁷Jiefuta su phe: "?Unu ta akponuru mu-a ashị; chifu mu l'unuphu ibe nna mu? ?Bu gunu kparu iphe, o bu nta-a, unu no l'iphe-ehuka-a be unu choharu mu bya?"

⁸Ndu bu ogerenya Giladu su: "Oo ya meru g'o gude anyi byapfutashia ngu-a; k'ophu ii-tsoru anyi je etsoo ndu Amonu ogo; l'i buru onye-ishi ndu bukota l'alị Giladu."

⁹Oo ya bu; Jiefuta su phe: "Unu -duta mu lashia azu ge mu je etsoo ndu Amonu ogo; ?mu a-buru-a onye-ishi unu k'eviya me Chipfu mee mu lwu-kpee phe?"

¹⁰Ndu bu ogerenya Giladu ono su iya: "O buepho Chipfu be bu onye-ekabe anyi le ngu. Anyi ee-mejeepho iphe, i pfuru." ¹¹Tobudu iya bu; Jiefuta bya etsoru ndu bu ogerenya ndu Giladu ono. Ndu ono mee ya onye-ishi waa onye-ishi ojogu phe. Jiefuta nodu le Mizupa pfushikota iphe ono, o pfuhawaru ono l'iphu Chipfu.

¹²No iya; Jiefuta bya ezia ndu-ozu g'ephe je ajia eze ndu Amonu su iya: "?Bu gunu be anyi meru ngu, meru g'o gude i byatashia anyi etso ogo l'alị anyi?" ¹³Eze ndu Amonu bya ezia ndu ono, Jiefuta ziru ozu ono; su phe: "Iphe, kparu iya nu bu le teke ndu Izurelu shi l'alị Ijiputu wufuta be ephe

natakọtaru mu alì mu shita l'enyimu Anọnu jeye l'enyimu Jiabọku; mbụ ja-sụ l'enyimu Jiódanu. Unu nụ-phuchaa mu alì ọbu azụ nta-a lẹ nchì-odoo.”

¹⁴ Jiẹfuta bya ezikwaa ndu-ozì iya ọzo g'ẹphe je eziphu eze ndu Amọnu ono azụ; ¹⁵ sụ iya: “Waa iphe, Jiẹfuta pfuru baa: Ndu Ízurelụ ta natakwaru alì ndu Mówabu; ọphu ẹphe anataduru ndu Amọnu alì pẹ. ¹⁶ Teke ndu Ízurelụ shi l'alì Ijiputu lufuta bẹ ẹphe shiru ụzo echiegu lufu lẹ Eze-enyimu Uswe-uswe; gbẹ l'ẹka ono bahu lẹ mkpukpu Kadeshi; ¹⁷ Ọ buru lẹ Kadeshi ono bẹ ndu Ízurelụ nọ zia ndu-ozì g'ẹphe je epfuaru eze ndu Edọmu sụ: 'Jiko g'anyi shijana-a alì ngu ghata.' Ọphu eze ndu Edọmu ta angaduru pẹ nchì. Ẹphe byakwaphọ eje ezia eze ndu Mówabu ẹgu-be ono; yẹbedua jikakwapho. Ọo ya bụ; ndu Ízurelụ kwaa lẹ Kadeshi. ¹⁸ Tọbudu iya bụ; ẹphe wulihu kwaseru echiegu; tsoru alì ndu Edọmu waa kẹ ndu Mówabu gbaa mgburugburu; bya alufuta l'uzo ẹnyanwu-awawa alì ndu Mówabu ono. Ẹphe je adọru l'azụ ẹnyimu Anọnu azụ iya ọphuu; ọle ẹphe ta abahuduru l'alì ndu Mówabu; kele ọo ẹnyimu Anọnu bụ oke alì ndu Mówabu ono. ¹⁹ Ndu Ízurelụ byakwa ezia ndu-ozì g'ẹphe je ezia Sihonu, bụ eze ndu Amọru, mbụ onye bu lẹ mkpukpu Heshibonu sụ iya: 'G'anyi shijana-a alì ngu ghata lashia alì nkanyi.'

²⁰ “Ọphu Sihonu ekwekwaphọ gẹ ndu Ízurelụ ghata l'alì iya. Ọ bya ekukọbekota ndu nkiya l'ọphu; ẹphe wufu je adọru lẹ mkpukpu Jiahazu; ẹphe lẹ ndu Ízurelụ lwugbabe ọgu. ²¹ Tọbudu iya bụ; Chipfu, bụ Chileke kẹ ndu Ízurelụ woru Sihonu; mẹ ndu nkiya l'ọphu ye ndu Ízurelụ l'ẹka. Ẹphe lwu-kpee pẹ. Ndu Ízurelụ nakọta alì ndu Amọru, bụ ndu bu l'ẹka ono. ²² Ẹphe lwutakota alì ndu Amọru; e shi lẹ Anọnu jasụ lẹ Jiabọku; mękwapho; a -gbẹ l'echiegu jasụ l'enyimu Jiódanu. ²³ Ọo ya bụ; eshi ọphu Chipfu, bụ Chileke kẹ ndu Ízurelụ chishichawaru ndu Amọru; bya eworu alì pẹ nụ ndu nkiya, bụ ndu Ízurelụ; ?ọ gbaru g'a nụ-phu ngu iya azụ ọzo tọo? ²⁴ ?Tọbudu iphe, agwa ngu, bụ Kemoshi nuru ngu bụ ọphu ìi-kwẹ ẹka? Nokwaphọ g'anyịbedua e-nweru iphe, Chipfu, bụ Chileke anyi nuru anyi g'anyi nweru bụ ono. ²⁵ ?ì ka eze ndu Mówabu, bụ Belaku nwa Ziporee? ?O tsoru ndu Ízurelụ opfu? Tọo; ?ẹphe l'iya lwuru ọgu? ²⁶ Ndu Ízurelụ bukọtaru lẹ Heshibonu; mẹ Arowa; mẹ nwa mkpukpu, nọ-pheru pẹ mgburugburu; mękwapho lẹ mkpukpu, nọchaa l'aguga ẹnyimu Anọnu ụkporo apha iri l'ise ọphu. ?Bụ gunu meru iphe, ì tị natachadaru alì ọbu lẹ teke ono? ²⁷ Mbẹdua te emeswekwaru ngu. Ọo gubedua, byaru etsoaha mu ọgu bẹ gbẹ achoro mu opfu. Ọle-a; gẹ Chipfu, bụ onye-ikpe, bukafukwa opfu ono, duru ndu Ízurelụ yee ndu Amọnu lẹ ntanụ.” ²⁸ Ọle eze ndu Amọnu bẹ ta ngakpodaru nụ nchì l'ozì ono, Jiẹfuta ziru g'e zia ya ono.

Jiẹfuta alwu ndu Amọnu

²⁹ Tọbudu iya bụ; Unme Chipfu bya eji Jiẹfuta ẹhu. Ọ bya eshijaa alì Giladu; waa alì ndu Manáse; bya eshijaa mkpukpu Mizupa, nọ l'alì Giladu.

Ọ bụru lẹ mkpụkpu Mizupa ono bẹ ọ gbẹ jeshia etso ndu Amọnu ọgu. ³⁰Jiẹfuta bya ekwee Chipfu ukwe; sụ: “Ọ -bụru l'i woru Amọnu ye mu l'ẹka; ³¹bẹ iphe, vukpọ ụzo gbafuta l'ulo mu bya agba mu ndzuta mẹ mu -lwụ-kpee ndu Amọnu lwajẹ; bẹ a-buru kẹ Chipfu. Mu e-gudee l'ya phọ gwee ngweja-akpọ-ọku.”

³²Tọbudu iya bụ; Jiẹfuta bya atugbua jeshia etso ndu Amọnu ọgu. Chipfu woru phẹ ye iya l'ẹka. ³³E -shi lẹ mkpụkpu Arowa jasụ l'uzo, eeshije abahụ lẹ mkpụkpu Minitu bẹ o mekotaru mkpụkpu ụkporo umerekete; mbụ gbua phẹ pyaapya ja sụ lẹ mkpụkpu Abẹlu-Keramimu. Tọbudu iya bụ; ndu Ízurelụ bya akapyabẹ ndu Amọnu.

Jiẹfuta eworu nwatibe iya kẹ mgbọko anụ Chipfu

³⁴No iya; Jiẹfuta lwarutaepho unuphu ibe iya lẹ mkpụkpu Mizupa; a bya ele ẹnya; nwatibe iya kẹ mgbọko nọdu akụwa nkwa; ete ebvu; agba iya ndzuta. Nwamgbọko ibe iya ono bụ nwa lanụ, ọ nwutaru kpẹekpu. Mbụ l'a -gufu iya bẹ o to nweedu nwa nwoke; ọzo nwa nwanyị ọzo ọ nwutabaaru. ³⁵Jiẹfuta hūmae ya phọ; o woru uwe iya lajashia; bya arashia: “Oowa-e! Nwada mu-e! I mewaru aphụ tsọru mu; mbụ mu bya aburu onye gba ẹka nwa; kẹle ukwe-iphe, mu kweru Chipfu bẹ mu ta adụkwa ike gẹ mu te emeru iya ya.” ³⁶Nwa iya nwanyị ono sụ iya: “Nnana mu! Iphe, i pfuru Chipfu bẹ i pfuwaru iya. Mee mu egube ono, i kwetawaru ukwe iya; eshinu Chipfu mewaru g'i gwata ndu ohogu ngu bụ ndu Amọnu ụgwọ iphe, ephe meru.” ³⁷Sụ iya: “Ole-a; iphe, ii-mekpọeru mu phọ kpoloko bụ g'i haarụ mu ọnwala labọ gẹ mu lẹ ndu ọnyà mu swiru je l'úbvú; je araa ẹkwa; kẹle mu ta abyadu aluru ji.” ³⁸Tọbudu iya bụ; ọ sụ iya: “Jenụ.” O dufu iya; o je l'úbvú je anọ ọnwala labọ yele unwumgboko, bụ ọnyà iya. Ephe raa ẹkwa kẹle ọ tọ byadu aluru ji. ³⁹Ọnwala labọ ono -bvuepho; ọ lapfushia nna iya. O woru iya mee egube ono, o kweru ukwe iya ono; ophu yee nwoke akwajeduru jasuru ọ nwuhu. Oo ya bụ; ọ bya aburu omelali, dū l'ali ndu Ízurelụ; ⁴⁰k'ophu bụ l'aphagapha bẹ akatikpo unwumgboko ndu Ízurelụ awufuje je anọ ujiku ẹno gude nyata nwada Jiẹfuta ono; mbụ Jiẹfuta, onye Giladu ono.

Jiẹfuta yele ndu Ifuremu

12 ¹Tọbudu iya bụ; ndu Ifuremu bya edzukọbe k'ọgu; bya adafu azụ ẹnnyimu Jiódanu azụ iya ophuu jeshia lẹ mkpụkpu Zafonu je aji Jiẹfuta; sụ iya: “?Bụ gụnu meru iphe, i jeru alwua ndu Amọnu; ophu i kuduru anyi? Anyi ejeakwa atụ ụlo ngu ọku g'o tsupyabẹ gubedua.”

²Jiẹfuta sụ phẹ: “?Ọ kwa lẹ mu lẹ ndibe mu bẹ yele ndu Amọnu shi nọdu l'ukukanyi; mu kua unu; ophu unu ekwedu bya adzọ mu l'ẹka phẹ. ³Mu hūmaepho l'unu ta agbaduru mu mkpu; mu woru ishi ndzụ mu tya; dafu azụ ẹnnyimu Jiódanu je adatso ndu Amọnu ọgu. Chipfu meekwapho;

mu lwu-kpee phe. ?Buhunu ole be unu gbę nta-a byatashia mu etso ogu?”
 4Tobudu iya bu; Jiefuta bya ekukobe ndu Giladu; epe je etsoo ndu Ifuremu ono ogu. Ndu Giladu lwu-kpee ndu Ifuremu; kele ndu Ifuremu suru phe: “Unube ndu Giladu; unu bu nlwamulwa, bya eburu l'echilabo ndu Ifuremu waa ndu Manase.”
 5Ndu Giladu je akwachishichaa eka eerwuje erwurwu l'enyimu Jiordanu lufu le mkpukpu Ifuremu. O nodu abujeru teke onye Ifuremu, nahuru nu gbarwutaru l'eka ono; oosu phe: “Ge mu gha-taeshikwa.” Ndu Giladu ono aja ya su iya ?I bu onye Ifuremu? Teke onye obu suru: “Waawaa.”
 6Epe asu iya: “O du ree; pfeedukwa: ‘Shiboletu.’” O nodu abujeru; onye jeru iya ekuku; o -kuswee ya kua ya “Siboletu”; epe egude iya woru gbua l'eka ono, eerwuje enyimu Jiordanu erwurwu ono. Le teke ono be e gburu ndu Ifuremu, du ukporo unu nemadzu ise l'unu ise.

7Noo ya; Jiefuta ono, bu onye Giladu ono; buru onye-ikpe ndu Izurelu apha ishi. O nwuhu; e lia ya le mkpukpu lanu, no l'ali Giladu obu.

Ibuzanu; onye-ikpe ndu Izurelu

8Onye ozo, byaru aburu Onye-ishi, ndu Izurelu ge Jiefuta nwuhuchaa-ru ono be bu Ibuzanu, onye mkpukpu Betulehemu. 9O nwutaru ukporo unwoke l'unwoke iri; waa ukporo unwanyi l'unwanyi iri. Unwumboko ibe iya ono be o keshichaa ru ji l'ipfu ozo. Unwu iya unwoke ono be o je-kwarupho alutachaa ru unwumboko l'ipfu ozo. Ibuzanu buru ishi ndu Izurelu apha esaa; 10nwuhu; e lia ya le mkpukpu Betulehemu.

Elonu; onye-ikpe ndu Izurelu

11Ibuzanu buchaaru ishi; Elonu, bu onye Zebulon bya aburu ishi ndu Izurelu apha iri. 12Tobudu iya bu; Elonu, bu onye Zebulon bya anwuhu; e lia ya le mkpukpu Ajialonu l'ali ndu Zebulon.

Abudonu; onye-ikpe ndu Izurelu

13Noo ya; Elonu nwuhuchaa; Abudonu; nwa Hilelu onye shi le mkpukpu Piratonu bya aburu onye-ikpe ndu Izurelu. 14O nwutaru ukporo unwoke labo; bya enweru unwu nwanwa, du ukporo unwoke l'unwoke iri. Epe nweru ukporo nkafu-igara eto le nkafu-igara iri. Abudonu buru onye-ikpe ndu Izurelu apha esato. 15Abudonu; nwa Hilelu, bu onye Piratonu nwuhu; e lia ya le Piratonu, no l'ali ndu Ifuremu l'ali ubvu ubvu ndu Amaleku.

Anwunwu Samusinu

13 1Ndu Izurelu bya emee iphe-eji l'anya Chipfu ozobaa. Oo ya bu; o nwuru phe ye; epe noo ndu Filisitayinu l'eka ukporo apha labo.

2O nweru nwoke lanu, bu onye mkpukpu Zora, epha iya bu Manowa. O bu onye shi l'ipfu ke Danu. O luru nwanyi; ophu nyee ya ono ta atsudu

ime; ọ nọdu ọp̄hu ọ tọ nwutaduru nwa. ³Tọbudu iya bụ; ojozi-imigwe, kẹ Chipfu bya ehee nwanyị ono l'ip̄hu; sụ iya: “Lenu; nta-a bẹ ị t̄i tsudu ime; ọp̄hu ọ dudu nwa, ị nwutaru; ọle ị-t̄suta ime; nwua nwa nwoke. ⁴Nta-a bụ g'ị kwabekwapho ẹn̄ya g'ị t̄i ngu mee; ọp̄hu ị ngukwa ip̄he, atsụ atsutsu; ọp̄hu ị rikwa ip̄he, aasọ nsọ; ⁵kele ị-t̄suta ime nwua nwa nwoke. G'a ta kpukwa iya ishi; noo kele ọo-buru onye duru Chileke iche e -shi l'ep̄ho. Ọo-wata adzo ndu Ịzurelu l'eka ndu Filisitayinu.”

⁶Tọbudu iya bụ; nwanyị ono tugbua je epfuaru ji iya sụ iya: “Onye kẹ Chileke byapfutakwaru mu. Ọ d̄ep̄ho akpabiri g'ojosi-imigwe kẹ Chileke. Ọle mu ta jikwanuru iya eka o shi; ọp̄hu ọ kọkwanuru mu epha iya. ⁷Ọle ọ s̄uru mu lẹ mu a-tsuta ime; nwua nwa nwoke. Lẹ nta-a bẹ bukwa gẹ mu ba angushi mee; ọp̄hu mu angukwa ip̄he, atsụ atsutsu; ọp̄hu mu erikwa ip̄he, aasọ nsọ; kele nwata ono a-buru onye duru Chileke iche e -shi teke ọ nọ l'ep̄ho jeye mboku, ọo-nwuhu.”

⁸Tọbudu iya bụ; Manowa bya epfuru nū Chipfu sụ: “Nnajiuphu; jiko menaa g'onye kẹ Chileke ono, ị ziru; ọ byapfuta anyi ono lwaphuta azu ọzo bya egoshi anyi g'anyi e-shi hee nwata ono, aa-nwu onoya.” ⁹Chileke n̄ma ip̄he ono, Manowa pfuru ono. Ojozi-imigwe kẹ Chileke ono byapfuta nwanyị ono ọzo lẹ teke ọ nọ l'egu; ọle Manowa, bụ ji iya bẹ yele iya ta atukoduru nọdu l'eka ono. ¹⁰Nwanyị ono gbaep̄ho egwegwa je epfuaru iya ji iya sụ: “Lenu-o! Nwoke ono, byapfutajeru mu mboku pho-a bẹ r̄wuakwaru ọzo!”

¹¹Manowa gbalihu tsoru nyee ya ono jeshia. Ọ bya abyapfuta nwoke ono; ọ j̄ia ya sụ: “?Bụ ngu bẹ pfujeru op̄fu nū nyee mu-a?”

Ọ sụ iya: “Ọo mu.”

¹²Ọo ya bụ; Manowa sụ iya: “Teke ip̄he ono, ị pfuru ono vukotaerupho; ?d̄enu egube anyi ee-gude hee nwata ono? Teme; ?bụ gunu a-buru ozi iya?”

¹³Ojozi-imigwe kẹ Chipfu ono sụ iya: “Gẹ nyee ngu mekọtaep̄ho ip̄he, mu pfuru iya ono. ¹⁴G'o to rikwa ip̄he, shikp̄o l'akpuru vayinu; ọp̄hu ọ ngukwa mee; ọp̄hu ọ ngukwa mee, atsụ atsutsu; ọp̄hu o rikwa ip̄he, aasọ nsọ. Iphemip̄he ono, mu tushiru iya ekemu iya ono bẹ oo-mekota.”

¹⁵Manowa sụ ojozi-imigwe kẹ Chipfu ono: “Jiko g'anyi sede nū ngu g'ị nọdu g'anyi gude nwa mkpi meeru ngu nri.”

¹⁶Ojozi-imigwe kẹ Chipfu ono sụ: “Unu e-sedekpokwa mu; ọle mu tee erikwa nri unu. Ọle ọ -buru l'oo ngweja-akp̄o-oku bẹ unu eme g'unu gwee; unu gweru iya nū Chipfu.” Ọp̄hu Manowa amakwanu l'oo ojozi-imigwe kẹ Chipfu bẹ ọ bụ.

¹⁷Tọbudu iya bụ; ọ bya aj̄ia ojozi-imigwe kẹ Chipfu ono; sụ iya: “?Iza gunu; k'ọp̄hu anyi a-kwabekwanu ngu ubvu m̄e ip̄he ono, ị pfuru ono vukotaep̄ho?”

¹⁸Ojozi-imigwe kẹ Chipfu ono sụ iya: “?Bụ gunu kparu ip̄he, iji mu ip̄he, mu aza? Epha mu dakikwaru uche amadu.”

¹⁹Tòbudu iya bụ; Manowa bya akpụta nweghu yekòbe iya ngweja-nri; bya egweshiru iya Chipfu l'eli mkpuma. Manowa yee nyee ya nòdukpoephe ele ọnya; Chipfu mee iphe, dụ biribiri; ²⁰noo kẹle ọku gbanwuhuerupho l'eli ẹka ono, eegweje ẹja ono; kpumia ala l'igwe; ojozi-imigwe kẹ Chipfu ono bahụ l'iroku ono. Manowa yee nyee ya hụmaephe iphe ono; ẹphe dachaa woru iphu kpube l'alị. ²¹Ojozi-imigwe kẹ Chipfu ono mechaa; ọphu ọ chafutabaeduru l'iphu Manowa yee nyee ya. Manowa gbẹ teke ono maru l'ọo ojozi-imigwe kẹ Chipfu bẹ ọ bụ.

²²Ọ sụ nyee ya ono: “Anyi a-nwuhukwa; noo kẹle ọo Chileke bẹ anyi hụmaru ono!”

²³Nyee ya ono sụ iya: “Ọme ọ dụ Chipfu g'o gbua anyi egbugbu mẹ o togo natadunu ngweja-akpo-ọku waa ngweja-nri ono, anyi nuru iya ono; ọphu o togo goshidunu anyi iphemiphe-a; ọphu o togo pfukwarupho anyi iphemiphe-a, o goshiru anyi-a.”

²⁴Nwanyị ono mechaa bya atsuta ime; nwua nwa nwoke; bya agua ya Samusunu. Nwata ono bya evuta; Chipfu kebe iya l'oma. ²⁵No iya; Unme Chipfu bya emeahaa ya ire l'ehu lẹ teke ọ nọ lẹ mkpukpu Mahane-Danu, nọ lẹ mgbaka mkpukpu Zora waa mkpukpu Eshutolu.

Samusunu alụ nwamgboko Filisitayinu

14 ¹O be ujiku lanụ; Samusunu jeshia mkpukpu Timuna. Ọ bụru l'ẹka ono bẹ ọ hụmaru nwamgboko Filisitayinu lanụ. ²Ọ bya alarwua unuphu; je asụ ne iya yee nna iya lẹ ya jekwaru mkpukpu Timuna; ya hụma nwamgboko ndu Filisitayinu lanụ. Sụ g'e jekwa alutaru iya ya g'ọ bụru nyee ya.

³Nna iya waa ne iya ono sụ iya: “?Tọ dukpoda nwanyị, dụ ngu ree l'ime unwada abubu ngu phe; ọzoo lẹ ndibe anyi? Gụbedua; ?bụ libe ndu Filisitayinu, bụ ndu te ebuduru úbvù ono bẹ ii-jeshia alụ nwanyị?”

Ọle Samusunu suleru-a nnana iya g'o je alutaru iya ya; l'ọo ya bụ nwa-mgboko ama iya mma shii.

⁴Ọphu nna iya yee ne iya ta amadu l'ọo Chipfu bẹ iphe ono shi l'ẹka; mbụ lẹ Chipfu aho g'oo-shi mekata ndu Filisitayinu; kẹle teke ono bẹ ndu Ízurelụ nọ l'ẹka ndu Filisitayinu.

⁵Tòbudu iya bụ; Samusunu yee nna iya waa ne iya tuko swiru jeshia Timuna. Ẹphe rwuepho l'opfu-vayinu, nọgbaa lẹ Timuna ono; a bya l'amaru; nwa oduma lufutawa; aba hanyihanyi azo-kube Samusunu. ⁶Unme Chipfu bya abya iya l'ehu k'ike. Ọ zuepho oduma ono gburumu; gude ẹka labushia ya g'onye labushiru nweghu nshii. Ọphu o pfuduru nna iya; waa ne iya iphe ono, o meru ono.

⁷Ọo ya bụ; ọ bya atugbua jepfushia nwanyị ono, oopfu k'alulu ono; yee ya bogbabechaa; nwanyị ono nọdu ama iya mma shii. ⁸E mechaa g'a nonyaaru; ọ laphushia azụ je iya aluta; ọ swiba gẹ ya hụma odzu oduma

pho. O hūma l'ēnwu gbawaru iya ite; manū-ēnwu dūwa iya. ⁹O gude ẹka kùkuta iya ritsoru ọzo. O jepfuepho nna iya waa ne iya; o nū phe; ẹphe ria. Ophu o pfukwanuru phe l'oo l'odzu oduma pho be o kùkutaru manū-ēnwu obu.

Ílú, Samúsinu tǔru

¹⁰Tobudu iya bu; nna iya bya ejeshia g'ọ hūma nwan yi ono. Samúsinu bya eshia nri ekele-nwan yi l'ẹka ono; kele oo g'unwoke, alu nwan yi l'ẹka ono emejekpo o bu ono. ¹¹No iya; ẹphe hūmaepho Samúsinu; ẹphe duru umadzu ukporo l'iri yeri iya g'ẹphe l'iya tuko nodu. ¹²Samúsinu bya asu phe: "Ge mu tukpodarupho unu ílú lanu. O -buru l'unu koru mu iphe, o bu lime abali esaa, a no le nri-a be mu a-nu unu uwe mgbalanu ukporo l'iri waa uwe, du iche iche ukporo l'iri. ¹³Teke o bu l'unu ta akotaduru iya; unu anu mbedua uwe mgbalanu ukporo l'iri waa uwe, du iche iche ukporo l'iri."

Ephe su iya: "Tueshiduru anyi ílú ngu obu; g'anyi numa."

¹⁴O bya aturu phe iya su:

"Iphe, erije iphe be iphe, eeri eriri shi lufuta.

Iphe, nweru okpehu be iphe, atso utso shii lufuta."

A no abali eto; ophu ẹphe adudu ike ko iphe, ílú ono bu.

¹⁵O be le mboku k'eno; ndu ono su nyee Samúsinu ono: "Dee ji ngu edede g'o karu anyi iphe, ílú ono bu; odumeka be anyi e-tsukwa ngu oku; gu le ndibe nna ngu. ?Bu iphe, i yeri anyi g'anyi bya bu g'i nata anyi iphe, anyi nweru to?"

¹⁶Tobudu iya bu; nyee Samúsinu ono bya anodu iya l'iphu raahaa ekwa; su iya: "Mu du ngu ashi! I ti yeduru mu obu ilile! I turu ndibe anyi ílú; ophu i ti kaduru mu iphe, ílú obu bu!"

O su iya: "Mu ta akoduru iya nna mu; ozoo ne mu; ?denu ge mu e-shi bya ako-chiaru iya gubedua?" ¹⁷Nwan yi ono rakota ekwa ujiku esaa, ẹphe no le nri ono. Oo ya bu; o be le mboku k'esaa ono; o woru iya koru iya; kele oopfukpoeru iya pho g'o koru iya ya. Yebedua je eworu iphe, ílú ono bu koru ndibe phe ono. ¹⁸Enyanwu bya ariba le mboku k'esaa ono; ndu mkpukpu ono su Samúsinu:

"?Bu gunu be ka manū-ēnwu utso?

?Bu gunu be ka oduma okpehu?"

Samúsinu su phe:

"O to bu l'unu kuluru l'eka ada-eswi mu no;

be unu tege adukwa ike ko iphe, ilu mu ono bu."

¹⁹Tobudu iya bu; Unme Chipfu bya iya l'ehu k'ike; o buru iya eje mkpukpu Ashikelonu je echigbushia ukporo umadzu l'umadzu iri; natakota phe iphe, ẹphe nweru. O chiru uwe phe, du iche iche chiru nu ndu ono, kotaru ílú ono, o turu ono. O gude ehu-eghu, enwu iya phuruphuru l'ehu

lashia ibe nna iya. ²⁰Ephe woru nyee Samusunu ono kee ònyà Samusunu, yeru iya ẹka ẹ teke ọolu nwanyi ono.

Samusunu atụ ọku l'iphe, ndu Filisitayinu meberu l'alì

15 ¹O rwuerupho teke eebuje witi; Samusunu kpụta nwada eghu; kpapfushia nyee ya ono. Ọ rwua ọ sụ ọgo iya ono: “Mu e-jepfua-kwa nyee mu ẹ mkpuru nkiya.”

Ọphu nna nyee ya ono te ekwedu g'ọ bahu l'ime ụlo; ²sụ iya: “Mu maru ẹ nyee ngu ono bẹ dụ ngu ashì ọkpobe adudu. Ọo ya meru g'o gude mu kee ya ònyà ngu.” Sụ iya: “?Nwune iya kẹ nwata ta akadụ iya ama mma tọ? Dutachinaa yẹbedua.”

³Samusunu sụ pẹ: “Nta bẹ mu nweru ẹka mu a-gbabe ọkpa meshia ndu Filisitayinu iphe ike; ọphu ụta taa dudu mu iya.” ⁴Ọo ya bụ; ọ tughua je akpukoo uphega ẹ ndzụ; kpụta pẹ ukporo iri l'ise; gude pẹ l'ite-ọdzu ligbabechaa pẹ ẹbo ẹbo. Ọ bya eworu ọwá lipyabechaa pẹ ẹ mgbaka ite-ọdzu ono. ⁵Ọ bya anwuru ọku yekota l'ọwá ono; parụ uphega ono hashichaa ẹka l'ẹka witi ndu Filisitayinu nọ. Ọ tụtota ọku ẹ witi, e gbushiwaru egbushi; mẹ ndu ọphu e teke egbushidu egbushi; je akpaa l'opfu-vayinu mēkpoo oshi olivu pẹ.

⁶Tọbudu iya bụ; ndu Filisitayinu sụ: “?Bụ onye meru iphe ọwa?”

A sụ pẹ: “L'ọo Samusunu, bụ ọgo nwoke Timuna bẹ meru iya nụ; kele e dutaru nyee ya kee ònyà iya.” Ọo ya bụ ndu Filisitayinu tughuepho je egude nyee Samusunu ono; waa nna iya kpọo ọku.

⁷Samusunu sụ pẹ: “Eshinu unu gbẹ mee ẹgube-a bẹ mu ta abyadụ aha unu; jasụ mu emelataada unu!” ⁸O tsoo pẹ ọgu ẹhuka ẹhuka; gbushia ndu dụ igwerigwe l'ime pẹ. O mechaa bya atughua je anọdu l'ogba, nọ l'oke mkpuma ẹ mkpukpu Etamu.

⁹Tọbudu iya bụ; ndu Filisitayinu wufu je adọru l'alì Jiuda k'ọgu; nochaa jasụ ẹ mkpukpu Lehi. ¹⁰Ndu Jiuda jia sụ: “?Bukwa ole bẹ unu byaru anyi etso ọgu?”

Ephe sụ: “Anyi byaru g'anyi gude Samusunu melata iya ụgwo iphe, o meru anyi.” ¹¹Ọo ya bụ; unu nemadzụ ẹsaa l'ukporo iri, shi l'alì Jiuda zafụ jepfushia Samusunu l'ogba, nọ l'oke mkpuma ẹ mkpukpu Etamu ono je asụ iya: “?Bụ ẹgube gunu bẹ i meru anyi ọwana? ?Tị madụ l'anyi nọ l'ẹka ndu Filisitayinu?”

Ọ sụ pẹ: “Ọo iphe, ephe meru mu bẹ mu melataru pẹ.”

¹²Ephe sụ iya: “Anyi byakwaru g'anyi kee ngu ẹgbu; kpụta je anụ ndu Filisitayinu.”

Samusunu sụ pẹ: “Unu riaru mu angụ l'unu te egbudu mu l'onwunu.”

¹³Ephe sụ iya: “Waawaa; anyi te egbukwa ngu. A kwa ẹgbu bẹ anyi e-ke ngu kpoloko; kpụta ngu je anụ pẹ.” Ephe bya egude ọkpukpu ọphúú labọ kee ya ẹgbu; bya akpufuta iya l'oke mkpuma ono.

¹⁴O rwutashia lẹ mkpukpu Lehi; ndu Filisitayinu tūru oko kpua ya; gbapfushia ya. Unme Chipfu bya iya l'ehu k'ike. Okpukpu ono, e kekotaru iya l'eka ono ribushihuephoo g'eba-oghu, e gude oku dabua; egbu ono, e kekotaru iya ono gbabushihukota iya l'eka dashihu. ¹⁵O humaekwapho okpu-agba nkapfu-igara, du ophuu ophuu; o dzukotae l'iya pho; gude iya chigbushia unu umadzu labo l'umadzu ukporo iri. ¹⁶Tobudu iya bu; Samusinu su:

“Okpu-agba nkapfu-igara be mu gude mee;
ephe kuta l'ikpo l'ikpo;
mbu; loo okpu-agba nkapfu-igara
be mu gude gbushia unu umadzu labo l'umadzu ukporo iri.”

¹⁷O pfuebechaa nno; o tuphaa okpu-agba nkapfu-igara ono; woru aka ono gube “Ramatu-Lehi”, bu iya bu “obvudu okpu-agba”.

¹⁸Tobudu iya bu; egu-mini bya agushiaha ya ike; o raku Chipfu; su iya: “Oo ngu be meru g'onye-ozu ngu lwu-kpe k'ophu paru aka egube-a. Nta; ?bu-chia egu-mini be a-gbe gbua mu; mu adaba ndu ono, bugba akpapi ono l'eka?” ¹⁹Chileke woru aka du nsuda le mkpukpu Lehi gbawaa; mini soshiaha ya. Samusinu bya anguchaa mini ono; ike bya adu iya; obu guzeta iya. O woru aka ono gube Enu-Hakore, bu iya bu “obvu-mini onye rakuru nu”. Obvu-mini ono nepho le mkpukpu Lehi byasu ntanu. ²⁰Samusinu buru Onye Ikpe ndu Izurelu ukporo apha le teke ke ndu Filisitayinu ono.

Samusinu aphokata oguzo, eeshije abahu le mkpukpu Gaza

16 ¹Samusinu bya ejee mkpukpu Gaza; je ahuma nwanji ukpara; o jee yee ya kwaa. ²Tobudu iya bu; a bya epfuaru ndu Gaza su: “Samusinu be byakwaru l'eka-a!” Oo ya bu; ndu mkpukpu ono je aso-pee aka ono nodu kwabekotaru iya lenyashi ono l'ophu; nodukota ngguingguji l'onu aka eeshije abahu le mkpukpu ono kwabekotaru iya lenyashi ono l'ophu asuje: “L'iphoro nchi-abohu be anyi e-woru iya gbua.” ³Samusinu ze l'eka ono jeye lechilabo abali. O gbe teke ono gbalihu je aphokata mgbo-oguzo, e yeru l'onu-abata mkpukpu ono; phokatachaa yee itso labo, e gude yee oguzo ono; mbu phota me mgbo-igwe g'ohakota dee l'ukuvu. O vutakota iya je enyihu mkpakponu ubvu ono, no gha iphu le mkpukpu Hiburunu ono.

Samusinu yee Delayila

⁴Tobudu iya bu; a nonyaepho; o bya eje eyee nwanji, bu le nsuda So-reku obu. Epha nwanji ono bu Delayila. ⁵Ndu-ishi ndu Filisitayinu bya ejepfu nwanji ono je asu iya: “Dejibekpoe ya pho g'o goshi ngu aka okpehu iya ono, paru aka ono nokpoo; dekwaa ya pho g'o karu ngu g'anyi e-shi gude iya kee ya egbu; bya akapyabe iya.” Ephe su nwanji ono l'ephe a-nuchaa ya ekpa mkpola-ochaa iri le nanu l'ehu l'ehu.

⁶ Ọo ya bụ; Delayila jepfu Samụsinu je asụ iya: “Jiko kanuru mu iphe, meru g'o gude ejo okpehu du ngu egube-a; iikafuaru mu egube ee-me gu-dekpoo ngu kee ngu egbu; mee ngu ewere.”

⁷ Samụsinu sụ iya: “Ọ -buru l'e gude okpukpu esaa, a swiru k'ophuú, ta akpohuduru nku kee mu egbu; be mu a-byaepho adu arwuhu; mu abya adu g'onye ozo du.”

⁸ Tɔbudu iya bụ; ndu-ishi ndu Filisitayinu bya achie Delayila okpukpu esaa, a swiru k'ophuú, ta akpohuduru nku; o gude iya kee ya egbu. ⁹ A chiru nemadzu domishia l'ime mkpuru; ephe ndu kwagebe akwagebe. O keebachaa ya ya; o sụ iya: “Samụsinu! Ndu Filisitayinu abyakwa ngu egude!” Ọ gbabushia okpukpu ono g'o bụ eba-oghu be e gude oku dabua. Ọo ya bụ l'a ta cho-vuduru eka okpehu iya no.

¹⁰ No iya; Delayila sụ Samụsinu: “Iichi mu eswe; bya adzu-pheru mu uka. Jiko kanuru mu gee-shikpo kee ngu egbu.”

¹¹ Ọ sụ iya: “Ọo e -gude eri ophuú, ta adudu iphe, e mejewaru iya kee mu pyataa; mu abya adu arwuhu; du g'onye ozo du.”

¹² Ọo ya bụ; Delayila bya achita okpukpu ophuú gude kee ya egbu. O nweru unwoke, domiru onwophe l'ime mkpuru; kwaberu iya. Ọ sụ iya: “Samụsinu! Ndu Filisitayinu abyakwa ngu egude!” Ọ lwubilihu; woru okpukpu ono, o keru iya l'eka ono gbabushia g'o bụ eba-oghu. ¹³ Delayila bya asụ Samụsinu: “Ime teke i shikwanu chita mu eswe; bya adzu-pheru mu uka. Kanuru mu egube ee-shikpo kee ngu egbu obu.”

Ọ sụ iya: “Ọ -buru li hakaharu egbushi mu-a uzo esaa; bya eworu iya ganga l'iphe, eegudeje ekwe ekwa; mbu kwepyabachaa egbushi mu ono l'iphe igudeje ekwe ekwa ono; bya egude ngga, i gudeje ekwe ekwa kpo-pyabeshia ya ike l'iphe iikweje ekwa ono be mu a-bya adu arwuhu; mbu bya adu g'onye ozo du.”

¹⁴ Tɔbudu iya bụ; Samụsinu kuerupho mgbenya; Delayila bya aloa egbushi ono, a hakaharu uzi esaa ono kwepyabe l'oghu, e gudeje ekwe ekwa; bya egude ngga, e gude ekwe ekwa kpo-pyabeshia ya ikike. Ọ bya asụ iya: “Samụsinu! Ndu Filisitayinu abyakwa ngu egude!” O zilihu le mgbenya, ooku; mi-lita ngga ono; waa iphe, e gudeje ekwe ekwa; me oghu, e gudeje ekwe ekwa ono. ¹⁵ Ọ sụ iya: “?Denu g'ii-shi sụ li yeru mu obu l'ebe abu l'obu ngu no l'eka mu no? Owaa kwewa ugbo eto, i chikotachaaruu mu eswe; ophu i kwedu koru mu eka okpehu ngu ono, paru eka ono nokpoo.” ¹⁶ Tɔbudu iya bụ; o tu-chinyaa ya nchi; epfupheru iya iphe ono mbokumboku; mbu pfutabe iya k'ophu bu like buvachaaruu Samụsinu buv esha iya. ¹⁷ Ọo ya bụ; o bya eworu obu iya pfukotaru iya; sụ iya: “A ta adajeduru mu akwo l'ishi; kele mu shi l'epho ne mu buru onye duru Chileke iche.” Sụ iya: “Ọ -buru l'a kpushiru mu ishi; ike mu alufu mu l'ehu; mu abya adu arwuhu; mbu du g'onye ozo mmanu.”

¹⁸ Delayila maerupho l'o pfuwaru iya obu iya; o zia ozi g'e je ezia ndu-ishi ndu Filisitayinu ono; sụ phe-a: “Unu lwafua azu ogiya-a l'o

pfugbuwaru mu iphemiphe.” Oo ya bu; ndu-ishi ndu Filisitayinu gude okpoga ono, ephe kweru iya ukwe iya ono byatashia. ¹⁹O bya emee Samusinu o nodu iya l'utafpu kuru mgbenya. O kua nwoke lanu; o bya akpushia ya egbushi iya ono, a swingashiru uzi esaa ono. O kpushichaa ya ya; Delayila kapyabe iya; okpehu iya ono phefuwa iya l'ehu. ²⁰Tobudu iya bu; o su iya: “Samusinu! Ndu Filisitayinu abyakwa ngu egude!” O bya etehu le mgbenya ono gbere riya su: “Ge mu bya emee ge mu emejehawaa; mu a-nyikofu nweru onwomu.” Ophu o to madu le Chipfu be pawaru iya haa. ²¹No iya; ndu Filisitayinu bya egude iya; woru iya enya swoshia; kpuru iya jeshia mkpukpu Gaza. Ephe bya ekee ya egbu; woru egbirigba onyirubvu tua ya; kpata iya ye le mkporo o je egweaha ereshi l'ulo mkporo. ²²A nonyaa egbushi, no iya l'ishi ono bya erwutaaha ozo g'a kpushicharu iya ya ono.

Anwuhu Samusinu

²³Ndu-ishi ndu Filisitayinu bya edzukobe g'ephe gwee ngweja, paru eka nu agwa phe, bu iya bu Dagonu; tekwaapho eswa; kele ephe epfu su: “Agwa anyi be wowaru onye ohogu anyi, bu Samusinu ye anyi l'eka.” ²⁴Ndu ono humauerupho Samusinu; ephe wata etu agwa phe epha; asuje: “Agwa anyi be wowaru onye ohogu anyi ye anyi l'eka; mbu onye ono meru; ali anyi buru mkpurupyata ono; mbu onye bu iya gbushiru igwerigwe l'ime anyi ono.” ²⁵Emereme jie phe pho eh; ephe tushia uzu; su: “Ge dufutaedurunu anyi Samusinu g'o meeru anyi iphe, ezi onochi.” Oo ya bu; a bya edufuta iya l'ulo-mkporo; o bya emeahaaru phe iya. O be teke ephe meru iya o pfuru le mgbaka itso, gudegbaa ulo ono; ²⁶Samusinu pfuaru nwokoro, sekpu iya l'eka su: “Meekwa mu ge mu mevuchaa itso ono, gudechaa ulo ono k'ophu bu le mu a-daphube iya.” ²⁷Ulo ono be unwoke me unwanyi jiru ejiji tsua erupfu. Iphe, bu ndu-ishi ndu Filisitayinu g'ephe ha be nokota l'eka ono. Leli ulo ono be unwoke l'unwanyi, no iya nu rwuru unu esaa l'ukporo iri, bu ndu nokota ele Samusinu l'eka oomeru phe iphe, ezi onochi ono.

²⁸Tobudu iya bu; Samusinu bya epfuru nu Chipfu su iya: “Gube Nnajiuphu, bu Chipfu; nyatanu mu! Gube Chileke; jiko menaa g'ike dufua mu ugbo lanu-a; k'ophu mu e-gude ugbo lanu-a gwata ndu Filisitayinu ugwo enya mu ephenebo-a.” ²⁹No iya; Samusinu bya aworu eka l'itso labo, bu iya gude ulo ono. O bya azu-beshichaa ya eka ike; mbu zu-be ophu no iya lekutara; bya azube ophu no iya lekicha. ³⁰Samusinu bya asu: “Ge mu le ndu Filisitayinu tukowaro nwushihukota!” O bya atsu-rweta; gude ike iya l'ophu nwubekota l'itso labo ono; ulo ono daa; tpyabekota ndu-ishi ono; me ndu ozo nokota l'ime ulo ono. Oo ya bu le ndu Samusinu gburu le teke o nwuhuru be ka igwerigwe eme le ndu ophu o gbushiru teke o no ndzu.

³¹Tobudu iya bu; unwunna iya waa ndibe phe tugbua je apata iya. Ephe je eworu iya lia le mgbaka mkpukpu Zora waa mkpukpu Eshutolu l'ilu Manowa, bu nna iya. Samusinu be kperu ikpe le Izurelu ukporo apha.

Mayịka agwọ ọbvu

17 ¹Ọ duru nwoke lanu, epha iya bu Mayịka, shi l'alị úbvú úbvú ndu Ifuremu. ²Ọ nonyaepfo ọ sụ ne iya: “Ekpa mkpọla-ọchaa iri le nanu ngu ono, e wotajerupho; mbu mu numajeru eka iitu onye wotaru iya nu onu ono be bukwa mu gude iya; mbu l'oo mbedua be wotaru iya nu.”

Ne iya ono sụ iya: “Ge Chipfu kebekwa ngu l'oma; nwa mu!” ³Ọ bya eworu unu mkpọla-ọchaa labo l'ukporo mkpọla-ọchaa iri l'ise ono nuphu ne iya azu. Ne iya ono sụ: “Mkpọla-ọchaa, shikota mu l'eka be mu tukowaru doberu Chipfu iche ge nwa mu gude iya meta ntekepe, a pyiru apyipyi; waa ọbvu, a kpuru akpukpu. Oo ya bu le nta-a be mu a-nu-phi ngu iya azu.” ⁴Oo ya bu; ọ bya eworu mkpọla-ọchaa ono nu-phukota ne iya ono azu; ne iya ono ye eka le mkpọla-ọchaa ono wota iya ukporo mkpọla-ọchaa iri je achie onye akpuje mkpọla-ọchaa. O gude iya kputa ntekepe; waa ọbvu. E je eworu iya dobekota l'ulo Mayịka. ⁵Mayịka nweru ulo-nshi; bya enwekwarupho uwe-ukuvu; mekwapho ọbvu ozobaa. O woru onye lanu l'unwu iya unwoke mee onye agwaje iphe. ⁶Teke ono be ndu Izurelu eshidu nweru ndu eze; onyemonye nodu anoduje eme go du iya. ⁷Tobudu iya bu; o duru nwokorobya lanu, bu onye Lívayi, shi le mkpukpu Betulehemu, no l'alị Jiuda. O shi buru l'echilabo ndu ipfu Jiuda. ⁸Nwoke ono lufu le mkpukpu ono tugbua jeshia achọ eka ozo, oo-buru. O jenyaa bya abahu ibe Mayịka l'alị úbvú úbvú ndu Ifuremu ono. ⁹Mayịka jia ya sụ: “?Bu awe be i shi?”

Ọ sụ iya: “Mu bukwa onye Lívayi. Mu shi le Betulehemu, no l'alị Jiuda; mu nodu achọ eka mu e-buru.”

¹⁰Tobudu iya bu; Mayịka sụ iya: “Ge mu le ngu bunuru; g'i buru nna mu waa onye a-noduje agwaru mu iphe. Mu a-nuje ngu mkpọla-ọchaa iri l'apha; akporu ngu uwe; bya azukwa ngu pho le nri.” ¹¹No iya; onye Lívayi ono kweta ge yee nwoke ono buru. Nwokorobya-a bya adu Mayịka go bu onye lanu l'unwu iya. ¹²Tobudu iya bu; Mayịka bya emee onye Lívayi ono onye agwajeru iya iphe; ọ bya aburu onye gwaaharu iya iphe; buwaruroo ya libe Mayịka. ¹³Oo ya bu Mayịka pfua sụ: “Nta-a be mu makporu le Chipfu ee-me g'iphe duru mu le ree; eshi ophu onye Lívayi buwa iya agwajeru mu iphe.”

Ndu Danu achọ alị, epe e-buru

18 ¹Teke ono be ndu Izurelu te nwedu onye eze. Ọ buru teke ono be ipfu Danu shi achọ eka epe e-buru; kele ọ to dudu alị, a heru phe, go buru oke alị phe l'echilabo okpa-ipfu ndu Izurelu. ²Oo ya bu; ndu Danu ono bya ezia ndu ojogu umadzu ise, shi le mkpukpu Zora waa mkpukpu Eshutolu g'epe je anwua ngge l'alị ono; maru go gbaru. Ndu ono be no-chikotaru enya unuphu phe go ha. Epe sụ phe g'epe tugbua

je anwua ngge l'alì ono. Ndu ono jerwua l'alì úbvú úbvú ndu Ifuremu; bya abahù l'ibe Mayìka je akwaa akwakwa l'enyashi ono. ³Èphe nò-kubeeppo ibe Mayìka ntse; èphe nùma olu-opfu nwokoròbya, bù onye Lívayi phò; bya amamobeerupho l'òo ya bè epfu opfu. Oo ya bù; èphe bahù l'èka ono; je ajìja ya sù: “?Bù onye du ngu bya l'èka-a? ?Bù gùnù bè iime l'èka-a? ?Bù gùnù meru iphe, ì nò l'èka-a?”

⁴Ò bya edoshikòtaru phè iphe, Mayìka meshikòtaru iya; sù phe: “Mayìka bè butaru mu ebuta gè mu buru onye agwajèru iya iphe.”

⁵Tòbudu iya bù; èphe sù iya: “Jiko jìtaeduru anyi Chileke g'anyi maru ije anyi-a; ?oo-nweru-a ishi?”

⁶Onye uke ono sù phe: “Unu jee lè chiriri werere. Chipfu bè tòwaru unu ọ̀zo l'ije unu ono.”

⁷Tòbudu iya bù; ọ̀madzu ise ono tųgbua bya ejerwua mkpųkpų Layishi. Èphe rwua l'èka ono bya ahuma gè ndu bu iya nù tųsaru èhu. Èphe bukųpųepho nwajii; nweru onwophè gè ndu Sayìdonu bu; kẹ̀lẹ̀ ọ̀ tọ̀ dudu onye-ishi, emekpa phè èhu l'alì ono m'ilile. Èphe bukwapphò ndu Sayìdonu ọ̀zenya; ọ̀phù ọ̀ dudu ndu ọ̀zo, èphe l'èphe emegbaa. ⁸Èphe bya alaphu azù lè Zora; mè lè Èshutolu. Ọ̀nwunna phè jìja phè sù: “?Dènu g'unu jeru iya?” ⁹Èphe sù: “Unu wulihu g'anyi je etsoo phè ọ̀gu; kẹ̀lẹ̀ anyi hụmawaru l'alì ọ̀bu bè dù rengurengu. Mbù; ?unu nọkwadua gbùligbuli? Unu te ejekwa anmarwùbè k'èje alwùta alì ono. ¹⁰Teke unu rwuèrupho èka ono bè unu a-huma gè ndu bu iya nù tųzoshihukotaru èhu; hụmakwapphò g'alì ono ha kẹ̀ phorokotokongu. Chileke woakwaru alì ono ye unu l'èka; mbù alì, ta adùdu iphe, dù lè mgboko-a duru ọ̀phù dù iya ọ̀ko.”

¹¹Tòbudu iya bù; ọ̀nu unwoke lè unwoke ọ̀kporo iri, bù ndu ipfu Danu ono bya akwaa ngwọ̀gu shi lè Zora mè Èshutolu wufu jeshia. ¹²Èphe jenyaa; èphe je adọ̀ru lè mgboru mkpųkpų Kiriyatu-Jiarimu, nò l'alì Jiuda. Oo ya meru iphe, ọ̀zo ẹnyanwu-arìba Kiriyatu-Jiarimu aza Mahane-Danu, bù iya bù “ọ̀du Danu” byasù ntanụ-a. ¹³Ò buru èka ono bè èphe shi jeshia l'alì úbvú úbvú ndu Ifuremu; bya awùba ibe Mayìka.

Ndu Danu apata ọ̀bvù Mayìka

¹⁴Tòbudu iya bù; ọ̀madzu ise ono, jeru anwua ngge l'alì ndu Layishi ono pfularu ọ̀nwunna phè ono sù: “?Unu maru l'ùlo-a, nọkọta egube-a bè o nweru uwe-ukuvu; waa ọ̀bvù unuphu; mèkwapho ntẹ̀kpe, a pyìru apyìpyi; waa ọ̀phù a kpuru akpųkpų nọgbaa ya nù? Nta-a buakwaaro g'unu; maru iphe, unu ee-me.” ¹⁵Oo ya bù; èphe swìba l'èka ono; bahù l'ùlo ọ̀phù nwokoròbya bù onye Lívayi ono bu l'ibe Mayìka. Èphe bya ekele iya ekele. ¹⁶Ndu Danu ono, dù ọ̀nu nemadzù l'ọ̀kporo iri ono, bukọta ndu kwarù onwophè ngwọ̀gu phò tųko pfųkotaru l'ọ̀nu ọ̀guzo. ¹⁷Ọ̀madzu ise phò, jèjeru anwua ngge l'alì ono phò bahù l'ùlo nshi ono je apata ntẹ̀kpe, a pyìru apyìpyi ono; waa uwe-ukuvu ono; waa ọ̀bvù unuphu ono; mè ntẹ̀kpe, a

kpuru akpukpu ono. Onye agwaję iya nų pfuru l'onu oguzo yele unu ۇma-dzu ukporo iri ono, kwaru onwophe ngwogu pho.

¹⁸O be teke ndu ono bahuru l'ulo Mayika je achikoo ntekepe ono, a pyiru apyipyi ono; waa uwe-ukuvu ono; me obvu unuphu ono; mekpoo ntekepe, a kpuru akpukpu ono; onye ono, agwaję iphe ono jia phe; su: “?Bu gunu be unu eme egube ono?”

¹⁹Ephe su iya: “Dobekwa onu doo. Te epfukwa me akpuru opfu lanu. Bya etsoru anyi gi buru nna anyi waa onye a-nodu agwajeru anyi iphe.” Su iya: “?O ka ngu ree go buru unuphu onye lanu be ii-nodu agwajeru iphe; eme le gi gwajeru ipfu waa ndu unuphu ndu Izurelu iphe?” ²⁰Tobudu iya bu; ehuru tsoahaa onye agwaję iphe ono ntumatu. O bya ewota uwe-ukuvu ono; waa obvu unuphu; me ntekepe, a pyiru apyipyi ono tsoru ndu ono.

²¹Ephe bya adakobe o buru phe atugbu. Ephe kparu unwegirima vuru uzo; me iphe-edobe phe; mekpoo iphemiphe, ephe nweru enweru. ²²Ephe jeribeerupho uzanya; me a -gbe l'ibe Mayika; a bya ekukoo ndu bunyabe Mayika; ephe zefu je agbabua ndu Danu iphu. ²³Ephe wata echi mkpu eekpu ndu Danu. Ndu Danu ghakobe su Mayika: “?Bu gunu eme ngu meru go gude i chita nemadzų byatashia anyi etso ogu?”

²⁴O su phe: “Unu gwetarų obvu mu; bya eduta onye agwajeru mu iya nu tugbu.” Su phe: “?Bu gunu be bu iphe, mu nwebakwadaaru ozobaa? Denuhunu g'unu gbe jahaa mu su: ‘?Bu gunu be e me ngu nu?’ ”

²⁵Ndu Danu ono su iya: “Ta byakwa apfuru g'anyi le ngu saka iya; odumeka be ndu obu oku a-byakwa ngu lehu; gu le ndibe ngu e-tuphaa ishi ndzu unu.” ²⁶Oo ya bu; ndu Danu wuru tugbu jeshia iphe, ephe eje. Mayika bya ahuma lephe ka iya okpehu; o kwe doo ghakobe; o buru iya ala unuphu.

²⁷Tobudu iya bu; ephe gweta iphe ono, Mayika meshiru ono; duta onye ono, agwajeru iya iphe ono tugbu. Ephe jeshia Layishi je etsoo ndu ono, bukpoeopho le nchi odoo; tusaru ehuru ono ogu. Ephe gude ogu-echi gbua phe pyaapya; woru oku tufu le mkpukpu ono. ²⁸Ophu o to dudu onye byaru adzota phe nu; kele ephe bu ndu Sayidonu uzanya; teme ophu o dudu iphe, ephe le ndu ozo emegbaje. Eka mkpukpu ono, bu Layishi no be bu le nsuda ubvu, no-kube mkpukpu Betu-Rehobu. Ndu Danu woru mkpukpu ono kpukwaa; buru. ²⁹Ephe gube mkpukpu ono Danu, bu iya bu epha nna phe oche, bu onye ono a nwuru Izurelu. Ole iphe, mkpukpu ono shi aza be bu Layishi. ³⁰Oo leka ono be ndu Danu doberu ntekepe ono, a kpuru akpukpu ono. O buru Jionatanu nwa Geshomu; mbu nwanwa Manase waa unwu iya be bu ndu gwaaharu ndu ipfu Danu iphe gbiriri jasų teke a byaru akpa ndu ali ono le ndzu. ³¹G'ulo Chileke nobekporu le Shilo be ephe gwakotaerupho ntekepe Mayika ono; mbu ntekepe ono a pyiru apyipyi ono.

Onye Lívayi yee nwanyi, o to ludu okpobe alulu

19 ¹Teke ndu Ízurelu te enwedu onye eze be o duru nwoke lanu, bu onye Lívayi, bu l'imime ali úbvú úbvú ndu Ifuremu. O duta nwanayi, o to ludu okpobe alulu le mkpukpu Betulehemu, no l'ali Jiuda. ²Ole nwamgboko ono wataru agba ukpara; bya alufu lashia ibe nna iya le Betulehemu, no l'ali Jiuda. O nochapho onwa eno l'ibe nna iya ono; ³ji iya gbeshi jeshia ya arworwo g'o lwa azu. O gbeshi kputa nkafu-igara labo; duta nwozi iya ephe swiru jeshia. Ephe rwua; nwamgboko ono duta iya; ephe bahu l'ulo nna iya ono. Nna nwamgboko ono huma e ya pho; bya egude ehutu gba iya ndzuta. ⁴Ogo iya ono, bu iya bu nna nwamgboko ono sede iya; yee ya noo ujiku eto. O nodu l'eka ono eri; angu bya ekujekwapho mgbenya l'eka ono. ⁵Tobudu iya bu; o be le mboku k'eno; ephe tehu lonmewa utsu; o kwakobe g'o lashia; nna nwamgboko ono su ogo iya ono: "Ria nri g'ehu shihu ngu ike teme l'ilashijewaro."

⁶Oo ya bu; ephebebo toko nodukota ria; ngua. E mecha; nna nwamgboko ono su iya: "Jiko nodufunaa l'enyashi-a; mee g'ehu tsofua ngu utso."

⁷Nwoke ono bya agbeshi ge ya lashia; ogo iya ono rwoyabe iya; k'ophu bu lo kwafuaru akwakwa l'enyashi mboku ono. ⁸O bya erwua l'utsu mboku, kwe iya ujiku ise; o gbeshi le ya alawa; nna nwamgboko ono sukwa iya: "Ria iphe g'ehu du ngu gbukuu; g'inodu teke o beru leswe l'ilashiwaro." Oo ya bu; ephebebo bya atuko nodu; rigba nri.

⁹Tobudu iya bu; o be teke nwoke ono; yee nyee ya ono; me nwozi iya pho gbeshiru g'ephe lashia; ogo iya ono, bu iya bu nna nwamgboko ono su iya: "Lenu; nta-a be o buakwaa uzenyashi; jiko kwafua akwakwa l'enyashi-a. Mbua; lenu le nchi ejihuakwa. Nodukwa; kwaa akwakwa l'enyashi-a g'ehu tsoo ngu utso. Teke o beru lonmewa utsu echele; igbeshi lashia unuphu ibe ngu."

¹⁰Obenu le nwoke ono be o to duedu g'o kwabaa akwakwa ozo. O gbeshi tugbua; o buru iya alala. O duta nyee ya ono; kputa nkafu-igara labo ono, o bochaaru ivu; o buru phe atugbu kwaseru uzo mkpukpu Jiebusu, bu iya bu Jierusalemu. ¹¹Ephe noduepho Jiebusu ntse; nchi nodu ejihugbuwa. Nwozi ono pfuaru nnajiuphu iya ono su iya: "Jiko bya g'anyi bahu le mkpukpu ndu Jiebusu je akwaa l'enyashi-a."

¹²Nnajiuphu iya ono su iya: "Waawaa; anyi taa bahudu mkpukpu ndu ohozo, ta abudu ndu Ízurelu. Anyi e-jechia jerwua mkpukpu Gibiya."

¹³Su iya: "Bya g'anyi kukebe ehuru jerwua mkpukpu Gibiya; ozo mkpukpu Rama g'anyi akwaa l'eka lanu l'eka ono." ¹⁴Oo ya bu; ephe tugbukwa; nchi jipfu phe le g'ephe eruwaa mkpukpu Gibiya, no l'ali Benjiaminu.

¹⁵Ephe rwua; bya aswiba; bahu le mkpukpu Gibiya g'ephe kwaa l'eka ono. Ephe je anodu l'edupfu mkpukpu ono; kele o to dudu onye dutaru phe nu g'ephe bahu ibe iya je akwaa.

¹⁶No iya; a bya ele ɛnya; nwoke ɔgerenya shiwaa l'ozì ɛgu eje alwa l'uzenyashi ono. Nwoke ono bɛ bɛ onye shi l'alì úbvú úbvú ndu Ifuremu. O bu ebubu lɛ Gibiya. Ndu bu l'ɛka ono bɛ bɛ ndu Benjiaminu bɛ ephe bɛ. ¹⁷Nwoke ɔgerenya ono bya apalia ɛnya hɔma onye ije, nɔ l'edupfu ono; ɔ jia ya; sɔ: “?Bɛ awe bɛ iije? Tɛme ?bɛ aweya bɛ i shi?”

¹⁸O sɔ iya: “Anyi shikwa Betulehemu, nɔ l'alì Jiuda eje ala l'imime alì úbvú úbvú ndu Ifuremu. Oo l'ɛka ono bɛ mu bu. Mu shi je Betulehemu; mu nɔdu alawa l'ulo Chipfu; ɔphu ɔ dudu onye dutaru mu duba l'ibe iya. ¹⁹Anyi gudekwaru nkafɔ-igara anyi ɛswa ɔkponku, ephe a-zɛ azɛ; waa nri, ephe e-ri; bya egudekwaphɔ nri waa mee k'anyibe ndu-ozì ngu; mbu kɛ mbɛdua; waa kɛ nwozi ngu kɛ nwanyi; mɛ kɛ nwokoro-a, anyi l'iya tuko swiru-a. O tɔ dukwa iphe, ɔko iya duru anyi.”

²⁰Oo ya bɛ; nwoke ɔgerenya ono; sɔ phɛ: “G'ɛhu dukwa unu guu. Unu hakpɔoro ɛka; mu e-meeru unu iphe, mkpa iya duru unu. Unu be jekwa k'azɛ l'edupfu.” ²¹No iya; o duta phɛ; lashia ibe iya. O bya anukota nkafɔ-igara nwoke ono nri. Ephe bya akwoebechaa ɔkpa; bya eria; ngua.

²²Ephe nɔdukwadu-a eme ɛmereme; ndu iwashi shi lɛ mkpukpu ono bya agbaa ɔlo ono, ephe nɔ ono mgburugburu. Ephe bya etsuaha ɛka lɛ mgbo; epfuru nwoke ɔgerenya, nwe ɔlo ono asuje: “Dufutaru anyi nwoke ono, bataru l'ulo ngu ono g'anyi jepfu!”

²³Onye ono, nwe ɔlo ono bya ekpufu etezi je asu phɛ: “Ndu mu; waa-wakwa! Unu te eweshinɔ iwashi. Unu te emeshinɔ ɛgube iphe-iphere ɔwana; eshinu nwoke-a bɛ ibe mu bɛ ɔ byaru. ²⁴Waa nwa mu nwanyi, nwoke teke ejepfuswee baa; wakwaphɔ nwanyi, nwoke ono ta aludu ɔkpobe alulu. Mu e-dufuta phɛ nta-a g'unu gude phɛ jepfu; mee phɛ ɛgube dukpoephe unu ree. Ole-a; unu te ejekwa eme nwoke-a ɛgube iphe-iphere du nno.” ²⁵Ole ndu ono ta ngaduru iya nchi. Oo ya bɛ; nwoke ono, byaru ɛbyaa ono bya edufuta nwanyi ono, ɔ tɔ ludu ɔkpobe alulu ono l'etezi; nɔ phɛ. Ephe gude iya phakota iya l'enyashi ono mgburugburu. Nchi bohujeeppo; ephe paru iya haa; g'ɔ tugbua.

²⁶Nchi bohushia; nwanyi ono kpota onwiya je adaa gburugudugungu l'onu mgbo ɔlo nwoke ono, nnajiuphu iya nɔ ono. O dabyiru l'ɛka ono gbiri-ri jeye nchi bohu. ²⁷Nnajiuphu nwanyi ono bya etehu l'utsu; guhaa ɔzo ge ya lufu lashia; nwanyi ono ɔ tɔ ludu ɔkpobe alulu ono dabyiwaru l'onulo ono; wushi ɛka l'onu-abata. ²⁸O sɔ iya: “Gbeshi g'anyi la!” O buru rigbidii. O kwe bya apata iya tu-kobe l'eli nkafɔ-igara iya; ɔ buru iya ala unuphu. ²⁹O larwua unuphu bya ewota mma gbubushia nwanyi ono, ɔ tɔ ludu ɔkpobe alulu ono lɛ nkwo lɛ nkwo. Kwakashia ɔzo iri l'ɛbo; chita je ekeeru ndu Izurelu l'ipfu l'ipfu. ³⁰Onyemonye humaru iya nɔ; nɔdu asuje: “ɛgube iya ɔwa bɛ ɛnya ta ahumajekwaru l'alì Izurelu; ɔphu e te mejekwaru ɛgube iya ɔwa e shikpoo teke ndu Izurelu shi l'alì Ijiputu lufuta gbiriri byasu ntanu-a. Unu rikwaa ya ɔriri; unu achiaru iya idzu; pfua iphe, anyi e-me.”

Ndu Ízurelu akwakọbe etso ndu Benjiaminu oḡu

20 ¹Tọbudu iya bụ; ndu Ízurelu l'ophu bya azafutakota e shi lẹ mkpukpu Danu jeye lẹ mkpukpu Biye-Sheba; mbụ jeye l'alị Gila-du. Ikpoto oha ono bya edzukọbe g'onye lanụ l'iphu Chipfu lẹ mkpukpu Mizupa. ²Ndu-ishi Ízurelu l'ipfu l'ipfu l'alị Ízurelu l'ophu bya edzukọ-ta l'iphu ndu kẹ Chileke, dzukọberu nụ ono. Iphe, ndu oḡoḡu pẹ, gude ọkpa; bya apagbaaru oḡu-echi dū bẹ bụ unu ugbo unu labọ l'unu ụkporo iri. ³Ndu Benjiaminu bya anuma lẹ ndu Ízurelu bẹ jerwuwaru mkpukpu Mizupa. Tọbudu iya bụ; ndu Ízurelu bya asụ: “Unu kọkpeeduru anyi g'ejo-iphe ọwana shikpoo nwua.” ⁴No iya; onye Lívayi ono, bụ iya bẹ alu nwanị ono, e gburu ono bya akọahaa ya su: “Mu lẹ nyee mu bẹ bahuru lẹ mkpukpu Gibiya, nọ l'alị Benjiaminu g'anyi je akwaa akwakwa. ⁵O be l'enyashi; unwoke ndu Gibiya byapfutashia mu; bya agbaa ụlo, mu nọ mgburugburu. Ephe nọdu eme g'ephe gbua mu. O bụru nyee mu bẹ ephe guderu k'ehuka jepfu jasụ o nwuhu. ⁶Tọbudu iya bụ; mu pata nyee mu ono gbubushia; chita iya wojechaa l'alị Ízurelu mgburugburu; kele ephe rwuru alị; bya emee ebyi l'alị Ízurelu. ⁷Nta-a; unubẹ ndu Ízurelu l'ophu; unu pfua g'ee-me iya.”

⁸No iya; ndu Ízurelu wulihukota g'onye lanụ; sụ: “O tọ dukwa m'onye lanụ l'ime anyi byaru a-la unuphu. Mbụ l'o tọ dudu m'onye byaru a-la ibe iya. ⁹Ole nta-a bẹ iphe, anyi e-me ndu Gibiya ta adukwa abudu g'anyi tya ido; egube ido ono meru bẹ bụ g'anyi e-me pẹ. ¹⁰L'okpa-ipfu Ízurelu l'ophu bẹ e-wofuta umadzu iri l'ime ndu ophu dū ụkporo ise; a hota umadzu ụkporo ise l'ime ndu ophu dū unu labọ l'ụkporo iri; a bya ahota unu umadzu labọ l'ụkporo iri l'ime unu ụkporo l'ise g'ephe buri ndu a-nodu evujeru ndu oḡoḡu nri. Oo ya bukwanu ephe -jerwua mkpukpu Gibiya, nọ l'alị Benjiaminu; ephe emee pẹ iphe, gbaru pẹ nụ lẹ k'ebyi ono, ephe meru l'alị Ízurelu ono.” ¹¹Oo ya bụ; ndu Ízurelu l'ophu bya edzukọbekota g'onye lanụ g'ephe tsoo mkpukpu ono oḡu.

¹²No iya; okpa-ipfu ndu Ízurelu bya ezia unwoke; ephe jegbabe ipfu Benjiaminu sụ pẹ: “?Ebyi ọwana, e meru l'echilabọ unu-a bukpo oḡu? ¹³Unu dufutaru anyi ndu iwashi ono nta-a; mbụ ndu Gibiya ono g'anyi gbushia; g'anyi shi nno wofu ejo-iphe ono l'alị Ízurelu.” Ole ndu Benjiaminu ta ngaduru nchi l'iphe ono, unwunna pẹ, bụ ndu Ízurelu pfuru pẹ ono. ¹⁴O buri iphe, ndu Benjiaminu meru bụ l'ephe jeru edzukọbe lẹ mkpukpu Gibiya g'ephe tsoo ndu Ízurelu oḡu. ¹⁵Ephe bya edzukọbe ụkporo unu nemadzu eto l'unu ise, bukota ndu pagbaa oḡu-echi, bụ ndu shikota lẹ mkpukpu kẹ ndu Benjiaminu; teme waa unu nemadzu l'umadzu ụkporo iri l'ise, bụ ndu e shi lẹ mkpukpu Gibiya hota. ¹⁶L'ime ndu oḡoḡu ono g'ephe ha bẹ unu l'ụkporo iri l'ise bụ ndu a hotaru, emegbaa eki-cha. Ephe bụ ndu maru g'agba mgbeka l'ehu l'ehu; k'ophu bụ l'ephe a-dụ

ike gude mkpuma gbata akpuru egbushi lanu; ophu ephe agbaswedu iya agbaswe. ¹⁷Ndu Ízurelu; a -gufukwa ndu Benjiaminu; bya edzukobe unu unwoke ugbo unu labo l'unu ukporo iri, bu ndu pagbaa ogu-echi. G'ephe ha bukota ndu alwuje ogu.

Ndu Ízurelu etso ndu Benjiaminu ogu

¹⁸Oo ya bu; ndu Ízurelu bya awu-lihu jeshia mkpukpu Betelu; je ajitaada Chileke; su: “?Bu ndu ole l'ime anyi be e-vuru uzo je etsoo ndu Benjiaminu ogu?”

Chipfu su phe: “Oo ndu Jiuda be e-vuru uzo je.”

¹⁹Tobudu iya bu; o be l'utsu iya; ndu Ízurelu wu-lihu je adoru kwaberu mkpukpu Gibiya. ²⁰Ndu Ízurelu bya awufu jeshia etso ndu Benjiaminu ogu. Ephe woru onwophe dozichaa g'ephe a-nodu too phe ogu ono le mkpukpu Gibiya. ²¹Ndu Benjiaminu bya eshi le mkpukpu Gibiya wufuta bya egba ndu Ízurelu ukporo unu umadzu labo l'unu iri l'ise le mboku ono. ²²Ole ndu Ízurelu be byaru eyeeru nwibe phe njima; bya edozichaa onwophe k'ogu l'eka ono, ephe shi nodugbaa le mboku k'ivuzo ono. ²³No iya; ndu Ízurelu bya awufu je araa ekwa l'iphu Chipfu gbiriri jasu l'uzenyashi. Ephe jikwaapho Chipfu su iya: “?Bu g'anyi je etsobaa unwunna anyi, bu ndu Benjiaminu ogu ozo to?”

Chipfu su phe: “Unu jenu.”

²⁴Tobudu iya bu; o be le mboku k'ebo; ndu Ízurelu wufutakwa bya g'ephe too ndu Benjiaminu ogu. ²⁵Le mboku k'ebo iya ono be ndu Benjiaminu byaru eshikwapho le Gibiya wufuta je etsoo ndu Ízurelu ogu. Ephe gbua ndu Ízurelu ukporo unu umadzu labo l'unu ise, bukota ndu pagbaa ogu-echi. ²⁶Tobudu iya bu; ndu Ízurelu l'ophu wufu jeshia Betelu je anodu kwaa ekwa l'iphu Chipfu. Ephe swikota egu mboku ono jasu l'uzenyashi. Ephe bya egweeru Chipfu ngweja-akpo-oku waa ngweja-ehu-guu. ²⁷Oo ya bu; ndu Ízurelu bya ajita Chipfu; kele teke ono be bu l'eka ono be okpoko ogbandzu Chileke shi nodu. ²⁸O buru Finehasu nwa Eleyaza; mbu nwanwa Eronu be bu onye eleta iya enya. Ephe jia Chipfu su iya: “?Bu g'anyi je je etsoo ndu Benjiaminu, bu unwunna anyi ogu ozo; to g'anyi te ejeshi?”

Chipfu su phe: “Unu je; kele echele be mu e-woru phe ye unu l'eka.”

Ndu Ízurelu alwu ndu Benjiaminu

²⁹Tobudu iya bu; ndu Ízurelu bya eye ndu nemadzu; ephe kpukotaru ekpuru gbaa mkpukpu Gibiya mgburugburu. ³⁰Ndu Ízurelu bya awufu jepfushia ndu Benjiaminu ogu le mboku k'eto ono. Ephe je edozichaa onwophe egube ono, ephe emejehawa iya ono nodu kwaberu ndu Gibiya. ³¹No iya; ndu Benjiaminu wufuta g'ephe bapfu ndu Ízurelu. Ndu Ízurelu defuta phe edefuta. Ephe shi le mkpukpu phe ono wufuta. Ephe bya

awata egbushi ndu Ízurelu egube ono, ephe egbujehawaa phe ono; k'ophu bu le ndu Ízurelu, ephe gbushiru l'egu; me le gbororo uzo, e shi eje Bete-lu; me ophu e shi eje Gibiya be du ukporo umadzu l'umadzu iri. ³²Tobudu iya bu; ndu Benjiaminu nodu epfu su: "Anyi egbushiakwa phe egube anyi gbushiru phe le k'ivuzo pho!"

Ndu Ízurelu nodu epfu su: "Unu g'anyi kpola azu g'ephe wufuta-gbua le mkpukpu; bya anodukota le gbororo." ³³No iya; ndu Ízurelu l'ophu lufukota l'eka ephe no; je akwakachaa k'ogu le mkpukpu Belu-Tama. Ndu Ízurelu, bu ndu ophu kpugbaaru ekpuru l'egbudu shichaa l'eka ephe no zefuta l'uzo enyanwu-ariba mkpukpu Gibiya. ³⁴Tobudu iya bu; ukporo unu nemadzu l'unu umadzu ise, a hotaru l'ime ndu Ízurelu l'ophu bya awufu jeshia etso ndu Gibiya ugu. Ugu ono kpohu oku; k'ophu bu le ndu Benjiaminu ta amadu le teke ephe a-buru mkpurupyata be rwuwaru nu. ³⁵Chipfu gude ndu Ízurelu lwua ndu Benjiaminu mboku ono. Ndu Ízurelu gbua ndu Benjiaminu ono ukporo unu nemadzu eto l'unu labo l'ukporo umadzu iri l'ise, bu ndu pagbaa ugu-echi. ³⁶Oo ya bu; ndu Benjiaminu huma la lwu-kpewaru phe.

Ndu Ízurelu paru ndu Benjiaminu haa laphushia azu; kele ephe kporu obu ye le ndu k'ono, ephe yeru ephe kwakaa l'egbudu le mgboru mkpukpu Gibiya ono. ³⁷No iya; ndu ono, domishiru onwophe l'egbudu ono gbaepho egwegwa bapfu ndu Gibiya; bya agbakashihu gude ugu-echi gbushikota ndu bu le mkpukpu ono l'ophu. ³⁸Ndu Ízurelu be ephe le ndu ono, domishiru onwophe l'egbudu ono chihawaru iya achichi l'ephe e-me ghenwuru-oku kpufu le mkpukpu ono. ³⁹Oo ya bu; teke ono ndu Ízurelu ghakoberu tsu-phuahaaz azu l'ogu ono; ndu Benjiaminu wata egbushi ndu Ízurelu; gbua phe ukporo umadzu l'umadzu iri pho; be ndu Benjiaminu wataru epfufu asuje: "Anyi alwuakwa phe egube anyi lwuru phe le mboku k'ivuzo pho!" ⁴⁰Enwuru oku kpufuepho le mkpukpu ono; ndu Benjiaminu bya aghaa enya huma le mkpukpu phe ono l'ophu be enwuru-oku, shi iya nu akpu ke tutuutuu ala l'akpaminigwe.

⁴¹Tobudu iya bu; ndu Ízurelu ghakobe wupyabe phe. Ndu-agugu rwu-ta ndu Benjiaminu; kele ephe mawaru le teke ephe a-buru mkpurupyata be rwuwaru nu. ⁴²Oo ya bu; ephe chie okpa l'oso gbalaaharu ndu Ízurelu; agba ala l'uzo echiegu. Ole ephe ta awaduru l'ogu ono. Ndu Ízurelu ndu ophu shi le mkpukpu ono awufuta be kwabutaru phe woru phe gbushia l'eka ono. ⁴³Ephe gbaa ndu Benjiaminu mgburugburu; chia phe je agba-bua phe iphu; zo phe pyakapyaka gbiriri jasu l'uzo enyanwu-awawa mkpukpu Gibiya. ⁴⁴Ndu Benjiaminu, e gburu egbugbu be du ukporo unu nemadzu labo l'unu ise, bukota ndu ojogu, ike du l'ogu. ⁴⁵Ephe ghakobe gbaru lashia l'echiegu l'oke mkpuma Rimonu. Ndu Ízurelu gbutsukwapho unu umadzu iri l'ebo l'ukporo umadzu iri le gbororo. Ephe chia ndu Benjiaminu kpabekpabe jasu le mkpukpu Gidomu; bya egbutsushifua unu

umadzu ise ozo. ⁴⁶Mboku ono be ndu Benjiaminu, e gburu egbugbu, bu iya bu ndu pagbaa ogu-echi be du ukporo unu nemadzu eto l'unu umadzu labo l'ukporo umadzu iri. G'ephe hakota be bugbaa ndu ike du l'ogu.

⁴⁷Ole unu nemadzu l'ukporo umadzu iri be duru ike nahu gbarwua echiegu oke mkpuma, Rimonu. Ephe nokota l'eka ono onwa eno mgburu-gburu. ⁴⁸No iya; ndu Izurelu bya alaphu azu; bapfu ndu Benjiaminu; je egude ogu-echi toko ndu bu le mkpukpu ono gbushikota; mbu gbukota iphe-edobe; mekpoo iphemiphe, ephe humaru. Iphe, bukpo mkpukpu, ephe jepfuru be ephe tushichaaru oku.

Unwanyi, ndu Benjiaminu a-luru

21 ¹Ndu Izurelu be ribuhawaru angu le mkpukpu Mizupa su lo to dudu m'onye lanu l'ime phe byaru ekuta nwada iya kee onye Benjiaminu. ²Oo ya bu; ndu Izurelu ono zafu je akuru le Betelu; nodu l'iphu Chileke kwaa ekwa kwashia ya ike; gbiriri jasu l'uzenyashi. ³Ephe nodu ara su: "Oowaa! Gube Chipfu, bu Chileke ke ndu Izurelu; ?bu gunu kparu iphe, egube iphe owana dapfutaru ndu Izurelu? ?Bu gunu kparu iphe, ipfu lanu a-nodu achihu achihu le Izurelu ntanu?"

⁴O beepho lonmewa utsu le nchitabohu iya; ephe woru oru-ngweja kpa l'eka ono; bya egwee ngweja-akpo-oku; waa ngweja-ehu-guu l'eli iya. ⁵No iya; ndu Izurelu bya ajia su: "?Bu ndu ole l'ipfu ndu Izurelu l'ophu be te etsodu bya g'anyi dzukoo l'iphu Chipfu l'eka-a?" Noo kele ephe ribuhawaru oke nte su l'onye ta abyaduru g'ephe dzukobe l'iphu Chipfu le mkpukpu Mizupa be e-gbu egbugbu. ⁶Tobudu iya bu; aphu rwua ndu Izurelu l'ehu l'opfu unwunna phe ono, bu ndu Benjiaminu. Ephe su: "Nta-a be ipfu lanu chihuru le Izurelu." ⁷Su: "?Denukpoo g'anyi e-me lushiaru ndu ophu phoduru nu unwanyi; eshinu anyi gudewaa epa Chipfu ribua nte lo to dudu nwada anyi, anyi byaru eke phe-a."

⁸Oo ya bu ephe bya ajia su: "?Bunu-a ndu ole l'ipfu ndu Izurelu be ta abyaduru g'anyi dzukobe l'iphu Chipfu le mkpukpu Mizupa?" No iya; ephe bya amaru le ndu mkpukpu Jiabeshi-Giladu be ta adudu m'onye lanu, byaru nu; ⁹noo kele ephe byaru edzua onwophe maru lo to dudu ndu Jiabeshi-Giladu m'onye lanu no l'eka ono. ¹⁰Tobudu iya bu; ndu ono, dzukoberu l'eka ono bya eye ukporo unu ndu ojogu l'unu ndu ojogu iri g'ephe je egude ogu-echi gbushikota ndu bu le Jiabeshi-Giladu; je akpachaa l'unwanyi; me unwegirima. ¹¹Ephe su phe: "Iphe, unu ee-me baa: Unu gbushia iphe, bukpo unwoke; me unwanyi, nwoke jepfujewaru." ¹²Lime ndu ono, bu le Jiabeshi-Giladu ono be bu unu unwumboko be ephe humaru, bu ndu nwoke teke jepfuswee. Ephe duta phe jeshia lodu phe le mkpukpu Shilo l'alí Kénanu.

¹³Tobudu iya bu; ndu ono, dzukoberu nu ono l'ophu bya ezia ozi g'e je ezia ndu Benjiaminu ono, no l'oke mkpuma Rimonu l'ephe l'ephe be

dūwaa lẹ ree. ¹⁴Ọo ya bụ; ndu Benjaminu lwatashia lẹ teke ono; a bya eduru ụnwumboko ono, a haru ẹphe nọdu ndzụ, bụ ndu shi Jiabeshi-Giladu phọ nụ phẹ g'ẹphe luru; obenu l'ụnwumboko ono ta asụdu phẹ.

¹⁵No iya; aphụ ndu Benjaminu bya erwua phẹ l'ẹhu; kele Chipfu yewaru ụwara l'ipfu ndu Ízurelu.

¹⁶Tọbudu iya bụ; ndu bụ ọgerenya lẹ ndu ono, dzukọberu nụ ono bya asụ: “?Denu g'anyi e-me k'ụnwanyi, ndu ọphu phọduru nụ a-luru; g'a tükowaru ụnwanyi, nọ l'ali ndu Benjaminu gbushigbua?” ¹⁷Ẹphe sụ: “Ọ tọ dukwa g'ee-me gẹ ndu Benjaminu, phọduru nụ te enweru okiphe; k'ọphu bükwanu l'ipfu lanu ta a-chihudu lẹ Ízurelu.” ¹⁸Sụ: “Ole anyi te e-kekwanu phẹ ụnwada anyi; eshinu anyibe ndu Ízurelu ribuwaru nte sụ: ‘Onye keru ndu Benjaminu nwada iya; g'onye ọbu bükwaru onye a turu ọnu!’ ”

¹⁹Ẹphe sụ: “Lenu! Anyi nwekwaru ọbo-iphe, anyi abọjeru Chipfu l'aphagapha lẹ Shilo, nọ l'uzo isheli mkpukpu Betelu; mbụ l'uzo ẹnyanwu-awawa uzo, shiru Betelu jeshia mkpukpu Shẹkemu; waa l'uzo ndọhali mkpukpu Lebona.” ²⁰Ọo ya bụ; ẹphe pfiaru ndu Benjaminu sụ phẹ: “Unu tųgbua je edomishia onwunu l'opfu-vayinu; ²¹kwagebekpọephọ. Teke ụnwumboko Shilo wufutaerupho bya ete ebvu; g'onyenonu gbafutachaa l'opfu-vayinu ono je egude nwamgboko lanu, ọo-luru; gude gbaru lashia ali ndu Benjaminu. ²²Teke ndu nna ụnwumboko ono; ọzoo unwune phẹ unwoke jeru epfupfu bẹ anyi a-sụ phẹ g'ẹphe meeruro anyi ree; yetaru unu ẹka; kele ọ tọ dudu nwoke, anyi gbuphoduru nwanyi, ọo-luru lẹ teke anyi lwuru ọgu ono. Liswi dukwa phẹ mma; eshinu ọ tọ budu ẹphebedua kutaru ụnwada phẹ kee unu.”

²³Ọo ya bụ; ndu Benjaminu mee nno. O be teke ụnwumboko ono ete ebvu; nwoke nonu gbafutachaa je azu-gude nwamgboko lanu; pata iya gbalaa g'o je a buru nyee ya. No iya; ẹphe lashia l'oke ali phẹ; je eworu mkpukpu ono kpukwa-zia; buru. ²⁴Tọbudu iya bụ; ndu Ízurelu wukahu l'ẹka ono teke ono; onyenonu lashia unuphu l'ipfu nkiya; mbụ onyenonu shi l'ẹka ono lashia l'oke ali nkiya.

²⁵Teke ono bẹ ndu Ízurelu eshidu nweru onye bụ eze phẹ; onyemonye shi anọduje eme g'ọ dū iya.